


**REV. RAMKENI SIANI BILSI
RITCHASA ONG-ANIKO MANIANINA
SEANIRANG**



**CHAPA KA-ATGIPA:
A-CHIK LITERATURE SOCIETY, TURA
2013**

**REV. RAMKENI SIANI BILSI
RITCHASA ONG·ANIKO MANIANINA
SEANIRANG**



**CHAPAKA·ATGIPA:
A·CHIK LITERATURE SOCIETY, TURA
2013**

© A·CHIK LITERATURE SOCIETY

FIRST EDITION: 2013

No. of Copies: 1,000

Dam: ₹ 80/-

Coverna Noksa Salgipa : Te Sembertush A. Sangma

Printed at:

Panthi Offset Printers,
Sukbir Bhawan, Tura

AGANCHENGANI

A·chik Literature Societyko a·bachengao Garo Literature Society ine biming donachim. Ja·mano Societyni Executive Committee tom·aniko dakate, chanchirime, “Garo” kattani pal “A·chik” kattako on·skana tik ka·aha. Indake Societyko “A·chik Literature Society” ine mingskaaha.

A·chik Literature Society A·chikku Sea-Jotaniko nambatatna, bariatna, gadang tang·doatna aro am·kolamna jotton ka·enga. A·chik Bananko tik ka·na gita, oikor mingantina Sub-Committeerangko done, kattarangni bananko tik ka·ani kamko a·bachengengaha. Somoi ra·gen; indiba salsaode an·ching pilakan apsan bananko jakkale segen aro poraigen. Da·odipetde, an·ching sakantian an·tangtangni namnika ba ong·nika banankon jakkalainga. Bano ‘t’ ba ‘k’ ge·gni ong·gen, ‘raka’ dongama dongja, ‘somo’ ong·genma ‘somo’-sa ong·gen, jajaanirang donga. Iarangko namatna Society kam ka·enga.

MBOSE-ni A·chikkuo Class-Ioni XII-ona tarigipa ki·taprangko, subjectantinan che·eme niaha. Classni kri text-ni meligijani, katta bichongrangko baseani, mingantikong, subjectna kragipa manderangko Sub-Committee done sandiaha. Ia Sub-Committeerangni am·e man·giminrangko dondime, Report tarie, Reportko MBOSE-ni Executive Chairman-na on·aha. Indiba da·alonaba uamangni aganchakaniko man·kuja.

Bilsiantian A·chik Literature Society General Conferenceko ong·atranga. Ia Conferenceo A·chik Literature Societyni Niam Amako ba Constitutionko namdapatna nangnikode namdapata, chanchirimanirangko daka aro Seminar ong·ate, Lekkarangko sebaate, uarangni bidingo chanchianirangko daka.

A·chik Literature Society jagittamprako “A·chik Ku·rang” magazineko chapa ka·ata. Man·adipet, A·chik jatni songsar, jatni dakbewal-rikbewalrang, niam-bewalrang, niam-retirang, A·chik Ku·sik, ma·gitcham

pagitchamrangonin ku·ritingbaenggipa golporang aro uarang gitako magazineo gata.

Ia kamrangko daka-ka·aniara Society-o tangka-paisa donggijanichi peng·pangatako man·a. Indaken Seminar Paperrangko ki·tapni bimango nakatatna skoba, sengkuna ga·akaia. 1991 bilsio, “A Tribute To A Tribal Genius” ine katta bichong done, Rev. Ramke Wa·tre Mominni Siani bilsiritchasa ong·aniko manina Seminar ong·ataha. Seminarna Seanirangko Rev. Ramkeni Janggi Tangani, Mondoliko Rikanio aro Silroro-Namroroatanio Bak Ra·ani, Salgro-Salaramni Baptist Mondolirangni Itihaso Mongsonggipa Bakko Ra·ani, Mandeni Bewal aro Toromni Dilgipa Ong·ani, Uni A·chikku Sea-Jotanina On·gilani, Lekka-Porana On·gilani aro Nokdang Ba·ku Dakanio On·paani-rango pangchakata. Dr. Caroline R. Marakni segimin “Rev. Ramkeni Janggi Tangani”-de changgipin Seminarna segipasa. Katta bichong apsanani gimin uko iano man·chapatenga. Ia Seminar Paperrangko ki·tapni bimango nakatatna 2011 bilsio tik ka·aha. Korosni bidingan ia ru·utani ja·pang a·sel. Gipin Seminar Paperrangkoba ka·sin ka·sin chapa ka·attokna chanchienga.

A·chik Literature Societyyni Executive Committee ia Seminar Paperrangko nipiltaie chapa ka·na tarichina chinga sakgittamna pakwataha. Indake chinga pilak seanirangko nipiltaie, “Rev. Ramkeni Siani Bilsiritchasa Ong·aniko Manianina Seanirang” ine Katta Bichong on·e, uko ki·tapni bimango nakatatna kusi ong·a.

Pa. Llewellyn Rangsang Marak
Ma. Brucellish Koksi Sangma
Ma. Brucelline Garrey Momin.

KATTA BICHONG

1. Rev. Ramkeni Janggi Tangani :

- Llewellyn R. Marak --- 1

2. Ramke Wa·tre Mominni Janggi Tangani

-

- Dr. Caroline Raksam Marak --- 11

3. Ramke Wa·tre Momin - Mandeni Bewal aro Toromo Dilani :

- Dr. Milton Snal Sangma --- 19

4. Rev. Ramkeni Mondoliko Rikna aro Namroro - Silrrooatna Bak

Ra·ani : - Rev. Martin Rongrokgre Sangma --- 24

5. Rev. Ramke Wa·tre Mominni Nokdang Ba·ku Dakanio A·chikna

On·paani : - Arjison Gabil Momin --- 32

6. Rev. Ramke Wa·tre Momin : Uni Salgro Salaramni Baptist

Mondolirangni Itihaso Mongsonggipa Biapko Man·ani :

- Lindrid Dalbot Shira --- 37

7. Rev. Ramke Wa·tre Mominni A·chikni Sea-Jotanio Jak On·paani :

- Filimina Bangshall Sangma --- 49

8. Ramke Wa·tre Momin : Lekka - Porani Bidingo Uibegipa :

- Viola Sonachi Bangshall Sangma --- 53

REV. RAMKENI JANGGI TANGANI

Llewellyn R. Marak

Janapchengani:

A·chikrangni janggi tangani bewalrang bilsi ritchasasotbongana skang maidake ong·enggenchim. Uaranko chanchiate niode, jumang gitasan chanchiatna man·aia. Ua salrango saksa sakgipinko a·jak sokgrike, a·song chigatangna a·song tate kosi songe janggi tangachim. Indaka salrango walni seng·na skang·skang do·oni gisikbaa gita, jrang·jrang aratbaa gita andalengpittion, Bilakgipa Isolni Gisik A·chikrangni janggina simbraaha aro uni ka·saaniko parape·na skaha. Ia seng·ani ja·dilko nikchenggiparangoni Omed aro uni gritang Ramke·an ong·a. Mikmalgijagipa A·chikrangni gisepo mikmalchenggipa aro mikasalchenggipa ong·e, Omed aro Ramke A·chik jatri gisepo teng·sugipa askirang ong·aha. Uamang atchijagenchimode, A·chikrangni janggi tangani bewalrang, ia chasongo dingtang bimangosa ong·genchim ine an·ching an·tangtangan ma·sina man·a. An·ching da·asalo jedakgipa gadango ong·enga, maidakgipa toromko ra·enga, maidakgipa bidako man·enga, maidakgipa gadango janggi tangenga, iarang pilaknan an·ching uamang mamasana gro nanggiparang ong·a.

Ramkeni Ma·bitchirang :

Gabil Wa·tre ma·kringoni, Mominma Rangminmani deritchurangoni Nodari aro Snori minggipa abisa a·kaweko game cha·na a·brioni ong·onbae, Raja Sangwilni deritchurantoniko abisaan segipa ra·eaha ina. Nodarini deritchurangoni saksako Wa·net mingachim. Wa·neto dedrang sakgittam dongachim. Uamangara, Noring W. Momin, Maljang W. Momin aro Omed W. Momin.

Atchiani Aro Bi·samiting Salrang

Ramke W. Momin 1833 ba 34 mango Matchokgre songo atchiaha. Uni pagipara Nawing Rangsang Dokgre Marak aro ma·gipara Noring

Wa·tre Momin. Nawing aro Noringo dedrang sakbonga dongachim, indiba sakgni chonchonmitingon siaha. Sakgittamsan tangrikaiaha. Uamangara, Ramke W. Momin, Fokira W. Momin aro Wa·re W. Momin.

Ramke bi·saintal be·en bilakgipa aro mangrakgipa ong·jaoba, ma·ana chonaonin dakchakna nangaha. Chonmitingo ua bi·saskarang baksa kal·grike rona namnikgipa, indiba ramram ku·sik agangipa ong·jachim.

Ua bi·saintal tom·tomgipa aro jripjrip chanchirakgipa ong·baaha. Tangsimgipa a·bri chiringrang sal, ja, askirang, aramrang aro mikka kimpretanirangko aiao inmane ua chanchina a·bachengaha. Chonaonin uo mandeni bil nalsachi maiba bil gnang ine ka·tongo kenanirangba nabaaha. U·ibachengon uni ma·a paa aro songni manderangni sabisi·sakonchioniko aro matburingrangni jakoniko an·tangtangko jokatchina, ba mi misirangko uamangna pattichina, do·bok, achak aro do·orangko rasote kritarangko nike, ua gisiko nangbaaha. Ua an·tangkoba duk a·sel nangarangoniko rakkichina, do·bokrangni pal mese bi·sarangko, achakrangni pal gukrangko aro do·orangni pal do·o bi·sarangko rim·e an·tang u·ia gita·miteko okame, chi·indikdik dakgipa biaprangona re·ange kritpaaha. Miterang gipinni janggiko on·ao katchaode, bi·sana krae uni on·akoba namnikgen ine chanchie ua kritpaachim. Ua Isolko u·igija sigenchimode, haida kritgipa kamal tuara ong·e janggi tangariko re·atnaba dongachim. Uni pagipani siani ja·mano, uamang neng·bee kam ka·esa cha·aniko man·achim.

Ramkeni bi·samiting salrangni gimin Dobaki, Ramkeni namchiktang, indake see donanga:-

'Aini (Wa're) agana ian, uamangni chonmitingon uamangni pagipa siaha. Ama bitchi bimchipbegipa ong·a, indiba ua an·senggipa ong·ja. Paa dongmitingo cha·na ringna chu·ongachim. Uni simanoa kangal ong·baaha. Aimang chona chona sakbri ba sakbonga dongakon. Indiba uamang gitchi·de·rakkujaon, gamoba cha·aniko okkae cha·na, gamna man·pajachim. Cha·asiani a·selde, ua salrango, A·kawerangona A·chikrang re·ange mande den·e katani gimin Sorkari anti·a·kang re·na on·gija ramarangko chipchangaha. Uamang buringni ta·ako am·e cho·e cha·rongaha ina. Mama Ramke ma·gipani ta·a cho·achi re·rike, mama

skang skang re·e, ta·a ja·pango mesoke on·ronga. Mama Fokira nogiparangko noko dongdilsoa. Uara attam salniangon, rama tong·saona re·soe, ai bakbak re·babo, mi okkriengjok ine nogiparangna skang skang an·tangan grapaha ina. Ma·gipa nokona sokon, merong jakkepsni, baksa ta·ako, miming song·e cha·dila. Ta·a namako detangrangna on·e, an·tangde skorangko cha·e tua.

Ja·mano ama bitchina mandeko on·achim. Uara aratgipa ong·a. Indaken ja·mano kangal ong·roroangaha aro gro dakangaha.

Ramke chonmitingo changgittam bilonge ga·akaha; changprakon dikdikprakna sibokaha. Uni bilsu chi·gnimang ong·mitingo, uamangni songoni Km 7 mang chel·ao saksa Zamindari kajinako gilgipa gnanchim. Kajina gilgipani Sorkar saksa Omed baksa maibakae u·igrikani dongachim. Omedna ua lekka skie on·na ku·rachakaha ina. Uni gimin Omed uni grigipa Ramkeko rimbite salanti attamo ba pringo, noktangni kam a·selrangko bon·atgija re·rurae skie ra·na a·bachengaha. Adita salrangni ja·mano Ramkeni wanggipa uni indake dakako namnikjaha. Uko gamna suna arate denggu dakenga ine re·na watjaha aro noko mepal sana on·jaha. Uni gimin ma·gipa sriksiksa una mi on·na nangaha. Uni ja·mano bilsu 14 mang ong·o, a·ba gital o·e bol ritamo bilonge ga·aktaiaha. Uko nikgiparang Ramkeko tangna ka·dongjaha. Uni gitokreng, pekuare bnekaha aro sre ong·katpilahachim. Uni jak aro jaksirang be·ropropaha. Ua rang·sitari ruuta salrangna mamingkoba u·igija sia gita dongaiaha. Pilak nina re·bagipa manderang uko tangjawaha ine aganaha aro ka·dongani dongjasrange, pilakan sangija galchipe nigopsrangari siangakosa nichake dongaiahachim. Ma·gipa jena kingking tangani chinko nikja, kalime oko merim rongsaba sikjaha. Mikselkalahaon, Ramke an·tangba, jak be·jok, ja·a be·jok ine u·ie, indita kangalni bi·sa tangana bate sian nambatachim ine gam·e grapaha ina.

Uni Poraina A·bachenga:

Ia a·sel ong·aniara pil·sa gitade namgnisa ong·pilaha; maina uni giminsa ua poraitaina Goalparachi re·angna chol ong·aha. Ramkeni wanggipa lekka porako namnikjani gimin, Omed·ba saksan re·na neng·nike skie ra·ako dontongsrangahachim. 1847 bilsio Captain

Jenkins-ni A·chikrangna mangsonge Goalparao kuligipa skulo Omed an·tang baksa ripeng sak gittamko rimbite re·ange skulo napaha. Ramkeba re·pana sikbeachim, indiba turamoni chakatnan amkujachim. Bilsisani ja·manosa ua rama re·na man·aha aro an·tangni skulo poraina skaniko uni wanggipa aro ma·gipana janapaha. Uni jaksamsa nosto ong·ahani gimin ma·a paa maming dakchakaniko on·na man·jawaha aro batesa bal ong·aigen ine chanchie uko champengjaha.

Indake Ramke jonggipa nanggipa Reban-ni pagipa chong·motan wanggipa baksa Goalparaona re·ange skulo napna skigipao sing·e niaha. Ua somoio skulo poraiatan baksa, uamangko nok rikani kamrangko ka·atna jakkaljolna nangani gimin, kam ka·atna man·jawa ine nike Ramkeko skulo rakkina sikjaha. Ja·mano Omed Gauhationa re·angdile East India Company-ni sahebo sing·e una jakko mesoke mol·moldilaha. Unon saheb una dakchakaniko on·na ku·rachake uko skulo napataha. Uamang mamasa uno bilsignimang poraiani ja·mano, mamatang an·tangan dal·dugaaha aro poraiangkuna neng·nike Gauhationa re·ange sipaini kamo napaha; gipinrangba skulko wate katpilaha. Ramke saksasan donge porairikaha.

Gisikni Jajaani:

Ramkeni poraimiting salrango, uni gisikna bang·a jajaanirang aro dongtogijanirang sokbaaha. Gipin bi·sarangna gitan ia skul Ramkena kakketko sandina uni gisikko tariaha aro cholko on·aha. Uni chonaonin mamatang una bilsi 7 ba 8 bribatani gimin aro mongsongbate gritangni chonmitingon pagipa siahani gimin, Omed uni nirokgipa gita una simsakaha. Uamang mamasaoni Omed-an dilgipa ong·e, pilakon chanchidilgipa aro dakdilgipa ong·aha. Chonmitingo Ramkeba uni mamatang gitan songtangni manderangni sko sotna re·angna tariako aro walo re·ongkatange an·chirara skorangko ra·e re·bapilako nikpaaha. Indaka bewalrangko nike Ramkeni gisiko jajaani ong·kataha. Ua poraimitingo gisik sramgipa ong·e, Bengali ku·sikko namen man·aha. Jak be·a dongani gimin bi·saskarangni kal·grikanirango ua jak on·pajaha; indiba iani a·selan gipinrangni kal·grikengmitingo saksan chanchina ua cholko man·skaaha. Bang·a changon sikdikdikgipa biap aro ramarango

re·e aro saksan chanchirikkite rorongaha. Hindu aro A·chikrangni bebera·anioba simano atchitaiani gnangchim. Sie atchitaitaie, jatskaoba, gipin jatoba, menggooba achakoba ba ugita gipin matburingrangoba atchitaia ine bebera·anirang gnangchim. Ianan uni gisikko wal sal so·sojengjeng ong·ataha. Uni ka·sara ma·drang ba·rimako wate siange gipin jatosa ba bobilosa ba matburingrangosa atchina nangode ba atchia changsao ma·drang ong·enba, changgipino jik dedrang ong·skana nangode ba basakoba saniba ka·sabea dedrang ba uamangni jila achak menggorangosa atchiskaode mairongpile bilding bildang ong·sranngen, namen chanchiate ua duk ong·beachim. Manderang iarangni gimin darangba tale agana gri aro an·tangba on·tisaba u·isikaba dongjani gimin ua jajrengaming kenaming dake dongtogija ong·aha. Chatroskarangming agangrike rogittoba, kal·grike ka·dinge romitingoba uko gisik ra·baon ua gisikan dongtogija kena napaiachim.

Attamsao 8 ba 9 bajimangni gisepo, mitamrang tusiangengaha, mitama poraiengpitti aro mitama golpo ka·e ka·dinge rotokengachim. Wal ka·sinangaha, do·kurang matkurang jripangaha. Ua sriksrik saksan ong·kate adita chel·a sorokona re·ange chanchie roengachim. Salgiko aro uno channa ampilgijagipa bang·bea askirangko nigitoe, badita walni ka·sinanga aro sikdikdik ong·anga, inditan gisik nangroroange ia pilakni nokgipa, bil man·batgipa saoba dongchongmota, uko an·tangan u·ikujaenga ine chanchia ong·katengachim. Ua gisik nangbee mikchi ong·katpile maiba u·iataniko una on·china pilakni kosako ong·gipa aro janggi silchini nokgipa chong·motko gisiktango okamaha. Skanggipa walo ua maming chinkoba nikjachim; indiba walgipinrangoba apsankon dakanguaha. Indaken walsao saks ba·ra bokako gangipa, uni adita chel·ao chadenge dikdiksani gisepon re·angpilako nikaha ine agana. Saoba mandeska an·tangni ma·ame gisiktango bi·ako knadikahama aro iano saksan sikdikdik dakgipa biapo maiko dakenga ine sing·ode, ua maiko aganchakgenchim ine chanchie gisiktango kratcha·engachim. Walgipinoba ua apsan bimangkon niktaiaha; indiba uko nikna skangan, "Nang·ni bi·ako knachakaha" ingipa kattako agana gita knaskaaha aro re·angpilakosa nikrikaiaha. Ua indake aganchakaniko knae aiao inmanaha, maina ua gam·e aganjachim aro gisiktangosa ba ku·misichisa

bi·engachim. Sawa uni indake bi·engako u·ie indine aganchakaha ine chanchie, ua mande ong·ja ine chanchia ong·kataha. Indake uni gisik on·tisa dongtokalaha aro maiba cholchi ma·siataniko una on·chongmotgen ine ka·dongna a·bachengaha. Ia ong·ani Ramkeni kena aro jajrenganirangko namen ritchengataha aro uko ka·dongataha.

Ua salrango uamangni skigipa gisep gisep chatro·chatrirangni dongramona re·bae roerongachim. Ua "Shisu Pathok" minggipa ki·tapko poraie, Ramni gimin aro Brahmanrangni gimin aro uamangko miteba mandeba mairongpile mandera·a uarangni gimin agane on·rongachim. Ja·mano Ramke ua ki·tapko man·pana sikbeaha. Indake ua, ia ki·tapko man·bae poraie niaha. Untal ua Brahmanrangko mande ra·na a·bachengaha. Soinasirang re·baode uamangko mandera·bee rang·san merongrang aro paisarangko on·atrongachim. Ram aro uni dal·a kamrangni gimin ua namen bebera·aha aro pringo chakate, cha·nasio, gipinchi re·nasio Ramni bimingko mingchengrongaha. Matchu, achak ba ugita gipin matburingrangmangba Ramni bimingko changsamangmang knaoba atchiramasachide mande gita ong·e miterang baksa kusi ong·e dongpana man·gen ine ua knaachim. An·tangde pangpang dondikgijan Ramko mingengani gimin, maming jajrenganin grisrang ine bebera·aha. Uni bi·anina aganchakaniara ian chong·mot ine ua bebera·na a·bachengaha. Ua Ramayan aro Mahabharatko basikba chang poraiaha aro gisik nangbeahachim.

Adita salrangni ja·mano, sin·kari badeango, pringsao saheb saksa Rev. R. Bion minggipa aro Bengali baburang sakgni Goalparaona re·bae aganprakeaha. Kristian toromni gimin talate segimin lekkarangko uamang jinmana suale donangon, Ramkeni skuloni ripengskarang uarangko man·angaha. Ua ki·taprangara, Apoti Nasok (Pa·sikaniko Gimaatgipa) aro Kristio Biboron & (Kristoni Ja·pang Kattarang) minggipa ong·achim. Ua ki·taprangko Ramke poraie niahaon, Hindu toromo bebera·aniranga ja·pang gri pa·sikanisan ong·bebea gita nikna a·bachengaha. Ja·mano uni gisik bilding bildang ong·na a·bachengaha.

Ia salrangni gisepo, salsao Ramke bilongbee saaha aro signok ine chanchitokaha. Indiba maibakae saksa oja re·bagake uko sanaha aro salchikkingmangni ja·manon ua an·sengsrangaha. Ua ojana duti kingsa,

chador kingsa aro paisa anna chi·briko on·ataha, maina una agre uo mamingba dongpajachim. Oja uarangko kusi ong·been ra·e una pattie donangaha. Bilsa bon·o porikka ra·on pilak Bengali aro Assamese bi·sarangnan ua bataha aro Magistrate uko mittelbeaha. Uni skanggipa ong·anina ua boksiskoba man·aha.

Kristian Toromko Ra·na Miksonga:

Ja·mano Ramke Rongjuli songona skigipani kamko ka·na re·angaha. Uano ua jachisa kam ka·e poraina re·angpilitaiaha. Unon Omed·ni Gauhationa okamate sea chittiko man·e ua kusi ong·beaha. Omedba Missionni mande grigipa bungalow te·saoniko apsan 'Apoti Nasok' minggipa ki·tapko sriksrik kolame poraiaha. Indake ua kristian ong·na miksongaha aro kristian pante Samuel Loveday aro Kandura Babuko gronge kristian toromni gimin bang·en skie ra·aha. Uamang mamasa badia toromko ra·ode namgen ine chanchigrikon Omed aganchakaha, "An·ching Mussalman toromkode ma·sibreja; Hindu toromko ra·ode an·chingde an·chingni ma·drang jongska adatangrang baksa cha·rim ringrimnaba man·jawaha; uni gimin saheb·rangni toromko ra·on skang gitan apsan cha·rim ringrimna man·gen. Uni gimin nangchongmota ong·ode ukon ra·gen." Unomitingo uamang ku·sikchisan mangsongaha; indiba kamchide dongkujachim. Uamang mamasa saheb·rangni toromko skie ra·na a·bachengaha; indiba uamang torom chong·motko sandiano chu·sokningjaha.

Gauhatio donga bilsisa ong·srangkujaon Goalparani D.C. Mr. Becket, Ramkeko okamate, Nibari antio pulis toksako rimange uano pulis a·damko songechina aganaha. Ua kamko namnikjaoba uko Normal Skulona watatpiljaha. Jabri ja·mano ua bilsigittamna Jirao kam ka·na nangaha. Uano ua toromni gimin gualaha aro namgija kamrangko ka·aha ine ua an·tangan sea.

Uni Nokdang Daka:

Jirao dongani ja·mano Ramkeko uni a·doktang sepang Damraona watattaiaha. Uano adita jarangna kam ka·ani ja·mano, Ramkeko pulis kamoniko wataha. Pulis kam ka·e uano dongengmitingo, Amjongani

saksa me·tra Suboni Bangbong Sangma baksa Ramke mikchagrikaha. Ua me·chika be·en bimang chongipa, mikterokrok dakgipa, ka·sachaka gnanggipa, namgipa bewal gnanggipa aro ka·sina ku·rangchi agangipa ong·achim. Damra antiko cha·mitingo salsao uamang gronggrikchengaha ina. Ramkeni pulis ganding chindingko nike Suboni uko mikchikkime nikaha. Banoba maiba a·sel ong·na nangode, banoba maiba golmal ong·katna nangode, gisegrikanirang dongode, jeoba Ramkeko nangaia ine Suboni chanchiaha. Indake pilakan tik ong·manahao, A·chik songsarekrangni bewal gita do·o manggniko rim·e do·sie uamangko jik aro se ong·ataha. Uamang do·siani ja·manosa, Ramke an·tangni kristian ong·na miksongako Subonina aganaha. Suboni mamingkoba ma·sijaoba, miterang aro A·chikskarang u·iode ka·onangbegen ine u·iaha. Ramkeni bia ka·daldal somoirango Ramke aro Omed bang·en chitti segrikaha. Kam watani ru·utgijan Ramke Gauhationa re·ange Commissionerni kachario setimgipani kamko ka·e, Subonikoba okamataha. Uni ja·mano, Omed aro Ramke kristian ong·na miksongsrangaha. Unomitingo uamangko darangba napbolatgipa dongjani gimin, uamang Rev. Miles Bronsonko bilsisa ong·pile sengsoaha. Indake 1863 bilsini February 8 tarik Robibar salo Omed aro Ramke mamasako Gauhatini Sukleswar Ghato napbolataha.

Napbolani Ja·mano:

Napbolatani antisa ja·mano Bronson Saheb Nowgongona re·angpilaha, maina unosa uamangni Mission Station ong·engachim. Uni ja·mano Ramke Revenue officeon kam ka·angkuaha. Uamang mamasa kamko wate songtangona re·bae aganprakna miksongaha. Bilsisamang ong·o, Rev. Bronson Gauhationa re·bataie, uamangko re·ange jattangni manderangna aganprakechina ku·pattiaha. Uamang mamasa 1864-ni May jani 11-gipa salo Nama Kattani bitchriko ra·e, a·songtang A·chik A·songona re·chakatbaaha.

Pilakna skang uamang an·tangtangni ma·drangko salbachengna man·aha. A·bachengo uamang bang·a neng·nikanirangko man·aha; indiba Ramke Damrao donge mamatang Omed gitade bang·a duk on·anirangkode man·jaha. Minggipin Ramkeni dukrangara, 1868 bilsio

uni o·bite siaha aro uni ma·drang pilakan songsarek ong·e bewal gita uoniko adita on·anirangko dabiaha. Ramke songsarekni bewalko ja·rikna sikjaha. Sigipani ma·drang gimik aro uni jikni ma·drangba gimikan uko bobil dakaha. Uni jongsari Naran minggipaba gumetangko dokna am·aha ina. Uandaken songo maiba a·sel ong·ode, sabisi sakanchi sokoba, kristian toromko ra·baani a·selsa ong·enga ine uamang ka·donaha. Indake ong·miting somoio Magua minggipa mande an·tang napbolani ja·mano, kosi songgipa ro·ongo ki·dape, ro·ongrangko pike galaha. Uni gimin manderang uko sinasipile dokaha. Ramkekoba dokna am·aha; indiba unomitingo Dr. Bronson aro Rangku unbaksa dongpaenba uko jakdangdikna pa·jaha.

Adita salrangni ja·mano uamangko ja·rikgiparang bang·batrorobaaha. Indake Damraoni salgipengchi adita chel·ao song gital dake dongdile apalgipa a·kaweko pe·e cha·dilaha. Uan ja·mano dal·begipa Nishangramni a·pal ong·aha. Ua songo Kristianrangna agre gipinrang dongjani gimin a·bachengo ua songko Kristianpara inesa mingachim. Dr. Bronson uanona gisep gisep re·bae, uamangna bang·a ku·pattianirangko on·rongeaha. Ramke antio changprak okgimu chake bi·rongaha aro uni bi·ako knachakchongmotaha ine nikna man·a. Ja·mano uni songdongdiligipa songko, namgipa aro dal·gipa song ong·chongmotgen ine niksoe Miksongani song ba Nishan ong·china ine untal Nishangram ine mingchengaha.

Uni Bon·kamgipa Salrang:

Ua Nishangram songo dongdile Mondoliko rikchengaha. Indake ua unon Reverend songako man·e skanggipa pamong ong·aha. A·bachengo Mondolio tangka dongjaoba ua an·tangko on·kange kam ka·angaha. Indake ruutgijan Omed aro Ramke an·tangtangni ma·drangrangko, dintang dintang biaprangona watataha. Uamang Rangsang·ko saliramchi Shyamnagarona, Rangku aro Bharotko Baghmarona aro Maljangko Dilmaona watataha.

Uni Bon·kamgipa Dukrang:

1878 bilsini a·bachengo uni jikgipa gisik brange kragija kamko

ka·aha. Uni gimin uko Mondoli a·pal galaha. Bilsini 1880 ni August 8 tarikosa uko rimnappilaha. 1881 bilsini July jao Ramkeni depante dejakra Dhonsing Turao napbolaha. Ua mande nambegipa aro toromigipa ong·achim. Uko Serampore-ona poraina Ramke tangkatangchi watataha. Uaba poraie re·bapilani adita salrangni ja·mano sagitike siaha. Uni siani jadok ong·srangkujaon, uni saksa kam·kam demechikba sisrangaha. Indake Ramke namen duk man·beaha.

Dedrangni siani ja·mano an·tangba ruute janggi tangna sikjaha aro uarangni gimin Dr. Bronsonna duk ong·bee seataha. Ua 1891 bilsini January 25 salo siaha. Indake gisik seng·begipa, lekka serakgipa, pamong procharok, skigipa aro missionary, Nokgipao kimkim ong·e kam ka·ani ja·mano, Isol uko an·tangona rimangaha. Uni jikgipa Suboni-ba chon·kaman salrango Nokgipao kimkim ong·e dongangaha aro merong jakkep-ko donchenggiparangoni saksa ong·paaha. Ua segipani ja·mano bilsini 14-na tangangkue, jringjrotna neng·takna segipako ja·rikangaha.

RAMKE WA·TRE MOMINNI JANGGI TANGANI

*Dr. Caroline Raksam Marak
NEHU, Tura*

JANAPCHENGANI:

A·chik Kristian ong·chenggiparangoni saksa ong·e, Ramke Wa·tre Momin jatangko gital janggi tanganiona ramako mesoke donangaha. A·chikrangna janggi tangani aro toromni bidingo seng·aniko ra·bana ua mamatang Omed Wa·tre Momin baksa kam ka·chenggipa ong·a. Uamangna skang darangba A·chik songona re·bae Nama Kattako aganprangkpa, A·chikrangni gisepo jatangko seng·atna skul kuligipa saksaba dongkujachim. Iamang mamasani kamko niode baditan ka·dongani aro toromo kimkimani uamango gnang uko nikna man·a. Ramkeni skul kuliachi A·chikranga skang chasongrangni gita game·sue cha·esan, a·songtangosan aro jatangosan dongaigija, gipinchiba ong·katangan baksa, gipin jatrang baksa badingana agreba, pilakni bidingon kam ka·rimpana chol ong·roroangaha. Uni Kristian toromna kam ka·aniara A·chikrangnasan do·gako oaigija, Indiani salgrosalaramni gipin a·brini jatrangnaba namgniko ra·baaha. Ua mamatang baksa jatangna kam ka·na a·bachengani giminsa, A·chikrangna dintangmancha American Baptist Missionaryrangko chotchanggija, saksani ja·mano saksa dake jakgitel ong·ani ja·manona kingking mondoliko aro lekka·porako nirokna watataha. Rev. Tangkhan·ni somoio A·chik songonin Nama Kattako gipin salgrosalaramni biaprangona ra·angaha. Ramkeni kam ka·ani biterangko ia chasongo nikna man·enga aro ian jat gimikni chasongni chasongna man·rikani ong·a.

RAMKENI BI·SAMITING:

Ramke 1833 ba 1834 bilsio Matchokgre songo atchiaha. Pagipa rake kam ka·rakgipa ong·jani gimin, ma·gipa bilake kam ka·skana nangachim. Uni chonmitingon pagipa sianghani gimin, Ramke dejakra ong·e ma·ani jakrimra ong·baaha.

Ua chonaonin chanchirakgipa aro chanchibewalani gisik gnanggipa ong·baaha. Songtangni nitogipa a·bri chiringrang, sal, ja, askirang, aram aro mikka kimpretanirang una aiao inmanani ong·achim.

Jattangni toromkoba ua ma·sie ra·achim. Songni me·aparangni saad·ing·a napjachina, matburingrang chikjachina ine mitena wak, do·bok, do·orangko doke kritako Ramke gisik nangen niachim. Bi·samitingon uaba darangba nikgijagipa biapchi re·ange bol ja·pangko rongtalate wakni pal mese, do·bokni pal guk aro do·bipani pal do·bisako krite daksningpaachim. Indake kritman·ode, ua matburingrang mamingba dakjawa ine ka·dongsrangachim.

Bilsi bonga aro bilsi skumangni gisepe ua changgittam bilonge ga·akaha; ua changantion dikdikprakna sibokahaoba be·en nosto ong·kamjaha. Bilsi chi·brimango ma·gipa, wanggipa aro mamatang Omed baksa a·ba o·mitingo, ua budu wedokdrugipa bol pangsako ritamengachim. Ua chubatgipa cheksiko den·aton, budu dingsa uni gitoko kaa gita binge, uko salona gita dake, ua mik 40 chuaoni ga·akonbaaha. Uni atte aro den·gimin cheksi uko ga·akdape ja·a ning·tue mataha aro uni jakasini jakni ja·dilrang, gitok ja·ta aro pekuarerang binekaha; sre ong·katpilaha aro an·chi jokbeaha. Uni pakkreo damgni aro jakgitoko damsa dake greng be·aha. Ru·uta salrangna ua siboke dongaiaha; nina re·bagipa pilakan tangjawaha inesa aganaha. Ma·gipa aro wanggipaba uko tangna ka·dongchakjae, sangija niari siangakosa nichaksrangaiaha. Ja gittamna tue dongna nangoba ua nampilaha; indiba an·tangni jak skang gita ong·piljawaha ine nikon, ua janggi tangani namgni dongjawa aro kangal ong·kamna nanggnok ine chanchie an·tangko so·ote sina sikipilaha.

PORAINA A·BACHENGANI :

Pil·sa gitade ia a·sel ong·aniara una namgni ong·aha; maina uni giminsa Ramke poraitaina Goalparachi re·angna chol ong·aha. Iana skang uni bilsi 12- mang ong·mitingo uamangni songni km. 6-mang chel·ao Zamindar saksana kajina gilgipani setimgipa sorkar Bengali saksako uni mamatang Omed u·iachim. Nokni manderang darangba didiatjaoba Omed lekka·porako man·pana sikbeani gimin, ua Bengali setimgipa una skina ku·rachakaha. Omed uni gritang Ramkeko rime salanti pring ba attamo,

nokni kamrangkoba ka'e re-rurae skie ra-na a-bachengaha. Uamangni Bengali oikorrangko ma-sibamitingon Ramkeni wanggipa indake re-ruraako namnikjabeani gimin ma-gipa uko watatjaha. Adita ja-mano Omedba saksan re-na neng-nike skie ra-ako dontongsrangaha.

Ia lekka-porani bidingon Ramke aro British sason ka-giparangni rama gronggrikaha aro mikkangchi Ramkeni re-gni ramako uan tariaha. Ramkeni atchina skangan Britishrang A-chik songona sepangrrobaengachim. Indian Civil Serviceni officer saksa David Scott 1823-o Bengalni salgro-salaram sima jolrangni Civil Commissioner aro 1826-o Brahmaputrani A-kaweko sason ka-gipa ong-baaha. Changsao A-chik sipai saksantingting sipai kotoksako dakgrike Scottni janggiko jokatantal A-chik sipairang uni namnikbatgipa ong-aha. A-chikrang A-kaweni songrangko so'e skorangko sote ra-angani gimin, 1816-on Scottko sima jolo tom-tomaniko ra-bana watataha. Pangkamgipa tom-tomaniko ra-bana gita ua Kristian saksa ong-e dingtangmancha chanchisamsoaniko A-chikrangna dake donaha. Uara Kristian Toromni Pangchakani bil ong-achim, jekon skulrang gita watatgenchim. Bilchi jakchi aro sastirangchi ong-ja indibajatkan Kristian Toromni Pangchakani bilchisa, jekon A-chikrang skulo skie ra-na man-gen uchisa jatko dingtangatna man-gen aro indakesa tom-tomaniko ra-bana man-gen ine ua bebera-aha. Ua Dr. William Careyoniko Calcuttao Fort William Collegeo Bengaliko skie ra-achim; ua uni skigipana mandera-anio aro Missionni kamo bebera-gipa ong-achim. 1822-onin ua A-chikrangna Missionaryko man-na krengoba chu-sokjaha. Uni jotton ka-anichi Singimario 1827-o Governmentni A-chikrangna kulie on-gipa skul bilsigipino uni skigipa Mr. Fermie sion bon-tongaha.

Bilsi sotbrini ja-mano dingtang obostarangosa Captain Jenkins Governmentni dakchakachi David Scottni chanchianirangko ja-rike, skul chonako A-chikrangna miksonge Goalparao 1847-o kuliaha. Ua skulni skanggipa miksonganiara, "Bang-gija mandera-ako man-na kragipa panterangko skia man-atna jemangko a-brirangona uamangni jongadarangona skigipa dake watatskana man-gen." Iano A-chik napchenggiparangoni sak 10-ni gisepo Omed aro Ramkeba ong-achim. Ia skul ru-ute janggi tangbangaoba bilsi 16- mangni ja-mano Omed aro

Ramke A·chikrangna gital chasong aro ka·donganiko ra·baaha. Indake Captain Jenkinsni jotton ka·aniara ong·gramaijaha.

Gipin bi·sarangna gitan ia skul Ramkena kakketko sandina uni gisikko tariaha aro cholko on·aha. Ua uko mikaoataha, una gisiko sandirikkite u·ina skaniko on·aha. Uni chonaonin mamatang Omed una bils i 6 ba 8 batani gimin aro mongsongbate gritangni chonmitingon pagipa siani gimin, uan uni nirok gipa gita una simsakaha. Uamang mamasaoni Omedan dilgipa ong·achim. Uan chanchidilgipa aro dakdilgipa ong·achim; Ramkeara sontol aro chanchirakgipa ong·achim.

Chonmitingo Ramkeba uni mamatang gitan songtangni manderangni sko sotna re·angna tariako aro walo re·ongkatange an·chirara skorangko ra·e re·bapilako nikpaaha. Ua skalrangna kenachim aro mitam manderang matcha pil·a ine aganako bebera·achim. Ua toromtangko ma·sie an·tangni do·o ja·ga sae man·arangko, biapko rongtalate tarie mitena on·rongachim.

A·kaweni antidamrangona Ramke mamatang aro gipinrang baksa re·angon uni u·iani batroroaha. Ua Goalpara aro Gauhatio sason ka·na re·bagipa gipok manderangni gimin knapaaha. A·chik dobasirangni (interpreter) Bengali sena aro aganna man·ani gimin ua namen gisik nangaha. Mamasaan poraina aro sena·jotna changpana sikbeaha aro oikorrangko mail songani ro·ongrango aro a·mango go·olchi aro ja·mano lekka bichitrango see nipaaha. Rajani kacharini babu saksa uamangna Bengali alphabetko skiaha. 1847-o uandakgipa antini salo Goalparao Government Schoolna me·a bi·sarangko nanga aro uamangna cha·a·ringani, gana· chinarangko on·e skigen; indake dal·gipa mande ong·atgen ine kobor man·aha. Iako songrangchiba jangange Omed, da·ode bils i 20 bataha, uni gritang Reban aro gipin sakgniko rimbite Wa·treparako wate saliramchi mikkange ua skulchi re·angaha. Ramke una antignimang skangsan boloni ga·ake jak be·e dongengani gimin re·angpana man·jaha. Ua skulo Hindu, Muslim, Rabha bi·sarang English, Bengali aro Persianiko poraisoengachim. Dongsogiparang namnikjani gimin A·chik bi·sarangna a·palo dingtang nok rike on·aha. Assamese aro Bengaliko adita man·ani gimin Omed pe·skagipa (interpreter) ong·aha.

Ramkeko uni jak be·e cholijani gimin wanggipa, Rebanni pagipa baksa Goalparachi re·angna on·aha. Skulko nike Ramke nappana

mol·molbeahaoba, skigipa uni jakni giminan uko napna on·jaha. Uni jak skoni kamna maming champengani ongjawa ine Omed jera ra·aha aro D.C.-ni hukumko man·kujana kingking an·tangna on·gipa cha·anirangko suale cha·gen ine mol·molaha. D.C.-ba songsaoni bi·sarang agre bang·jok ine chanchiachim; indiba Omed jotton ka·stape ja·mano Ramkekoba biming sepaaha.

Bilsigni apsan skigipani ning·o poraioba maming man·dapaniko nikjae, Omed aro Ramke ka·dongbee Lt. Agnewni bungalowchi doange, bils 20-na ua skulo poraioba mamingkoba skie ra·na manjawa ine uamang una aganaha. Unon skigipako okamate rang·san uko kam watataha. Uni ja·mano kam ka·rikgipa uamangko nambee skiaha aro poraigiparang uko namnikbeaha.

Aditani ja·mano Governmentni koroschi Guwahatiko nina steamero uamangko rimangon, A·chik pante sakgni aro Omed sipaio nape dongrikaha. Ramke ringo skulona re·bapilaha.

RAMKE MAIKAI KRISTIAN TOROMONA SALBAKO MAN·AHA:

Re·angpilon uo gisiktango bebera·ani bidingo sing·anirang gngangchim. Poraianio ua gisik sramgipa ong·e Bengaliko namen man·aha. Jak nampiljani gimin kal·anirangko kal·pana man·jae ua saksan re·rame chanchirongachim. Hindu torom gita kamni kri dingtang dingtang bimango atchia ine bebera·ode, atchitaio an·tangni nokdangni manderangkon u·ijawa aro uamangna ka·saani gimagen ine ua nikaha. "Ia gipin jatrang ka·saja, indiba mitchia, chonnika aro ang' baksa aro angni ma·drang baksa rorimja", ine nike uni gisik namen dongtojaha. Toromni bidingo ua mamingba skia aro poraia dongjaoba, uni janggi duk ong·beon, ua "Father of Spirits"-o mol·molaha aro untal ua "Isol gngang aro uko bimchipe am·gipa pilaknan on·pilskaa" ine u·iaha.

Changsao saksan re·rammitingo buringo re·napsike gisiko duk ong·aniko dakgrikna ua rang·san skaha. Ua jripjrang dakao an·tangni dongimin dukrangni gimin da·o chanchie parakgija ka·siksike grapaha; indiba ua maiba ka·donganikode nikaha. Maiba gisik miterangna batgipa donga ine aro ua pangnajolan dongkamgipa pattianiko on·na cholko

dakna man·a, ine ua bebera·aha. Uni ja·mano jriprang dakao uni dukko namata gita ua nikaha aro ua saksan ong·ja saoba uni sambao gnang, jeni dongo miterang maming namgijako dakna man·ja, ine ua u·iaha. Uo Ramke dakchakani aro pattianiko bi·aha. Salgipino apsan biap aro somoio re·bae uni bi·aniko mingtaion jriprang ong·achim.

Attam gittam bi·ani ja·mano bon·kamgipao, ‘angni bi·ani biapni sepango changrogipa, mikkim chagipa mande chadengachim aro angni nachikkolo, "Nang·ni bi·aniko knaaha", ingipa kattako aganagita gam·aha.’

Ia nikanian Ramkeko kenaoniko jokataha aro pilakchin apsan ong·oba uni gisik ka·tongode ua dingtang mande ong·aha. Ia gisikan pilakna batgipa ong·ani gimin ua manderangnaba kenjaha

Hindu toromko nitaion ua uko bilding bildang dake nikaha, indiba sadhu aro sainasirangko nama gita nike, ua uamangchi re·ange an·tangni nikani aro ku·rangni gimin aganaha· Gipinrang gita uamangde uko chonnikjaha aro Ramayana aro Mahabharatako poraichina on·ataha. Indiba ua ru·utgijan badia chong·motgipa torom uko basee ra·genchim.

Daccaoni Rev. Rupert Bion 1856 bilsini sin·kario Assamona gipin procharokrang baksa re·baon, Goalpara bajaroba aganprakangaha. Kristian toromni gimin talbate segimin kattarangko uamang jinmana suale donangon, saksa sakgni Ramkeming skulo poraigiparang uarangko man·angaha. "Apoti Nashak" minggipa ki·tapko Ramke uamangoniko bree poraion, uni gisik bingbrangtaiaha. Untal ua gururangchi re·angjaha aro skangna bate duk ong·bataha.

Bilsisa Rongjulio Primary schoolo teacher ka·e Goalparachi re·angpilon, Omedni Gauhationa okame seata chittiko man·e, ua kusi ong·beaha. Omedba Missionni mande grigipa bungalow te·saoniko apsan "Apoti Nashak" minggipa ki·tapko sriksrik kolange poraiaha. Ua Kristian ong·na miksongsrangaha aro Kristian pante Samuel Loveday aro Kandura Babuko gronge Kristian toromni gimin bang·en skie ra·aha.

Uamang gronggrike badia toromko ra·o namgen ine chanchigrikon Omed aganchakaha, "An·ching Mohammedan toromko u·ija; Hindurang jat mania aro an·ching uamangni toromko ra·ode jattangko galna nanggen; sahebrang jat chanja; uni gimin uamangni toromko ra·o pilakni bidingo nama."

Uamang sakgni Kandura babuchi sahebrangni toromko skie ra·na re·angaha; indiba uamang torom chong·motko sandiano chu·sokningjaha. Bilsisa ong·kujaon Goalparani D.C. Becket Ramkeko Nibari antichi police dolni skotong dake watataha. Ua kamko namnikjaoba uko Normal Schoolona watatpiljaha. Jabri ja·mano ua bilsa gittamna Jirao kam ka·na nangaha. Ua toromni gimin gualaha aro namgija kamrangko ka·aha ine ua an·tangan sea. Damraona transfer ong·on uni kam bon·na skang ua Amjongani me·tra Suboni B. Sangmako jik kimaha. Ua an·tangni Kristian ong·na skako aganon Suboni mamingkoba ma·sijaoba, miterang aro A·chikskarang u·iode, ka·onangbegen ine u·iaha. Bia ka·daldal somoirango Ramke aro Omed bang·en chitti segrikaha. Kam watani ru·utgijan Ramke Gauhationa re·angaha. Ru·utani ja·mano ua Gauhatio Commissionerni kachario setimgipa dake kam man·e Suboniko okamataha.

Omed skangan Kristian ong·na aro bakbakan napbolna miksongsrangaha. Ramke re·baon uaba Kandura Babuchi re·ange Kristian toromni gimin u·ibataha. Sakgnian da·ode napbolna tariaha. Napbolatgipa darangba dongjani gimin, uamang Rev. Miles Bronsonni Nowgongoni re·baako bilsisa ong·nasipile sengaha.

1863-ni Feb. 8 tariko Robibar salo Gauhatini Sukleswar Ghato uamangko Rev. Miles Bronson napbolataha aro uamang un salo Gitelni Meatamko cha·chengaha. Napbolani ja·mano Ramke aro Omed maiko dakgen chanchiaha. Omed an·tangni manderangna Jisu Kristoni jokatani gimin aganprakna namnikbee, Rev. M. Bronsonko A·chikrangna Missionary dongjama ine sing·aha. Uamangko re·dilna darangba dongjani gimin uamang sengkua; indiba bilsa gipino Omed re·mikkangna miksongsrangani gimin, Ramkeba kamko wate "Missionary Assistant" dake a·songtangchi re·angpilaha. Uamang May 10 tariko Goalparaona soke uamangna dakchaknasigipa Capt. B.W.D. Mortonko grongeha. Damrao Ramke skul kulina miksonge nokko rikataha; Omedara

songrangona re·roroe aganpraskagenchim. Uamang Damra anti aro
songtang Matchokgre aro Wa·trepara-o Nama Kattako aganprakaha.
Ramke an·tangni jonggipa chonbatgipako aro sakgni bi·sarangko
songoniko Damrachi skulo poraiatna rimangaha. Ramkeni toromi ong·e
janggi tangara uni chatrorangna mesokani ong·aha; uamangba Isolo bi·na
aro antio changsa okgimu chakna skie ra·aha.

RAMKE WA·TRE MOMIN - MANDENI BEWAL ARO TOROMO DILANI

Dr. Milton Snal Sangma

Aganchengani:

Da·alo Ramkeni siani bilsa ritchasa ong·ahani gimin uko nikrikgipa darangba dongjaha. Uni gimin ua maidakgipa chong·mot ong·achim, uko aganna man·gipa dongja. Song·nokrangoba uni bidingo agana golporangba dongangrrojaha. Uni gimin anga jerangko segenchim, uarang Ramkeni gimin janape segipa ki·taprang ba articlerangonikosa kolamskile seani ong·gen. Angni pangchake segipa ki·taprang - William Careyni The Garo Jungle Book, Ramkeni Kristo Bandhob, Kandura Mominni Ramkeni Janggi Tangani, Jubilee Report - 1886 aro A·chik Ripengo segipa articlerang ong·a. Ia segiminrangoniko ra·gope indake aganna man·gen; “A·chik A·songni ba·gipa degiparangoni nambatsranggiparangoni Ramkeba saksa ong·a.”

MANDENI BEWAL

(a) Kakket dakgipa aro bimchipgipa:

Ramke namen kakket ong·e kam ka·gipa aro bimchipgipa mande ong·achim. Ua jeko bebera·aha ba ma·siaha, una kakket ong·achim aro una bimchipen kam ka·achim. Chonmitingo ua miterangna kenachim aro uarangna bimchipen boli on·rongachim. “Simano atchitaia” ingipa Songsarekrangni bebera·gipako uaba bebera·e aro ja·mano uko namnikjae an·tangni janggi tanganio una bate nambata toromko bimchipen sandiaha. Uandaken ua Goalpara aro Gauhatio poraimitingo nambatgipa toromko ning·tuen sandiaha. Police ka·mitingoba ua me·chik bi·sa Elizabeth mnggipani golpochi de·mesaako man·aha. Policeni kamko wate Gauhatio clerkni kamko ka·mitingo ua kakketgipa toromko am·taiaha. Uandaken ua walsao mamatang Omedko okame an·tangtangna, a·songna aro jatna mai toromko ra·on nambatgipa janggi tanganio on·na man·gen

aro simano nambate janggi tangna man·gen, uko seokna ine chanchirimaha. Bon·kamao Kristian toroman nambatgipa ong·a ine, Kristian pil·e napbolahaon ua mamatangko ku·monge jatskarangna an·tangni bil, jak, gisik aro ka·tongko on·kange Kristian toromko bimchipen kam ka·angaha. Poraimitingo badita rake aro bimchipe poraiaha aro seanirangko ranta ka·aha, indaken ua Kristian toromko jelbra-jelsuatanioba raken aro bimchipen kam ka·aha.

(b) Skie ra·na skani gisik donggipa:

Uo chonaonin bebe aro kakketko u·ina skani gisik gnangchim. A·gilsakni seng·aniko u·ina skani gisikba dongachim. Uandaken ua mamatang Omed baksa songoni Rongjuliona re·rurae kajina ra·gipa officeni baburango lekka-porako skie ra·paachim. Mile postrango segiparangkoba ja·rike a·dimuo sepae niachim. Poraimitingoba ua maming kal·anikoba kal·gija lekka poraisimsimachim aro indaken classoba skanggipa ong·rongachim aro boksirangko man·rongachim. Nambatgipa toromko u·ina ske ua Ramayana, Mahabharat aro gipin gipin Hindu sastrorangkoba mikosto man·pilen poraiaha. Uarangko chu·ongnikjae ua Kristianni chonchongipa seanirangkoba gisik nangen poraiaha. Gauhati Normal Schoolo poraiani ja·mano Nowgong Normal Schooloba poraina re·angna skachim, indiba jikgipa aro Omedni jechakani giminsa re·angjaha. Uandake ua schoolni text bookrangko sena, A·chikkuchi ring·ani gitrangko dakna aro Sastroni bang·a bakrangko A·chikkuona pe·na gita, Assamese aro Bengalichi rokom rokom seanirangko poraiaha. Uni an·tangni janggi tanganiko segipako poraiode uni A·chikni niam-ritirangko, bewalrangko u·ianiko aro uni sena changaniko u·ina man·gen. Indake ua Indiani Salgro-Salamni pilak a·brini jatni manderangni gisepo skanggipa an·tanganin lekka-sena changtelgipa ong·achim.

(c) Sontolgipa aro bamgipa:

Ramke bi·saonin sontolgipa ong·achim. Uni janggi tanganio ua darangkoba gisik saatna sikjachim. Uni chatro Maguako songsarekrang uamangni kosirangko galruruana ka·onange sinasipile dokgrimoba aro

Ramkeko una matnangoba ua a·jak sokjaha. Namachisa amna jotton ka·aha.

Uo bamani gisikba atchikapachim. Rongjuliona re·ruræ poraiako wanggipani namnikjani gimin ua duk ong·oba dontongaha. Ma·gipani kattako maniaha. Uni skanggipa janggi tangani bakrango ua Omedna bame uni ku·pattiani gita janggi tangaha. Goalparao poraimitingo ua masterrangni kattako manibeachim aro Hindu sadhurangni kattarangkoba bebera·e uamangna bame ja·rikachim. Police kam ka·mitingoba ua sorkarina bame kakketo kam ka·achim. Ua jikgipana ka·sae ong·a kattarangna bame janggi tangachim. Uandaken ua Kristoko ra·chakon Una bamsrange an·tangni janggi-jama gimikkon on·kangsrange Una a·ba gamaha.

(d) Ka·dongna man·gipa mande:

Ua pilaknin ka·dongna man·gipa mande ong·achim. Una je kamko on·oba ua bil ama dipet ka·achim. Uandaken ua chonmitingo bilgrioba gisik nangen a·barangko o·paachim aro nokni kamrango dakchakpaachim. Uo ka·dongna man·ani gimin chatro ong·oba uko Rongjuli L.P. Skulo masterna watataha. Uko Head Constable dake Nibari , Jira aro Damraona watataha. Bja ka·manarin Ramke jikgipa Suboniko wate Gauhatichi katangoba aro ma·drang galchina aganoba, Suboni uo ka·donge kakket ong·e dongaha. Skulni bidingoba uo ka·dongna man·e, Bronson Saheb 1868 bilsio uni Damra Skulko Teachers' Training Schoolona ra·doataha. Uo ka·dongna man·e uko Bibleni bang·a bakrangko pe·na on·aha aro git tarianirangko giljao ring·aha. Uni segimin essay aro poedorangko skul text ki·tapo ra·ataha. Gimik Missionaryrangan uo pangchakesa pilak kamko ka·aha. Uandake ua pilaknin ka·dongna man·gipa mande ong·aha.

(e) Mandeni Namgnina Dakgipa:

Ua A·chikrangna janggini cha·ani mangmangko ra·baaijaha, indiba a·gilsako janggi tangmitingo be·enna cha·ani aro gisikna cha·anirangnaba gital cholrangko A·chikrangna dake donangaha. Una agreba ua gitcharn songsarekni songsarko gale Kristianni gital songsarko Nishangram songo

dakdilangaha.

Nishangram songo ua Krisitiankosan nokchake uamangna gital janggi tangani cholrangko on·na ine a·pal pe·e cha·dilangaha. A·pa pe·giparangna chiko ra·bae on·na gita ua Dandalma chiringko na·gil ka on·aha. Ki·taprangko see aro skulrangko kulie ua A·chikrangna gisikn cha·anirangkosan on·aijaha, indiba dingtang dingtang kamrangko kam ka· janggi tangani cholkoba dake on·aha. Uni indake mandeni aro a·songn pilak a·bakuo silroro·namroroanina dakdilchengani gim·in uko "Make of Modern Garo Hills" ine mingna man·gen.

2. TOROMO DILANI:

Omed aro Rāmke Kristian toromko A·chik a·songona ra·bamangmangaijaha, indiba janggi tanga dipet Ramke una chiru·a·gataha. Omed Rajasimla Mondoliko rikaha aro sepangjolrango aganprakaha. Ramke Damrao dongchenge rokom rokom kamrangchi Mondoliko A·chik A·songrango rikdilaha. Damrao, Goalparao aro Turao Head Pandit ong·e ua an·tangni chatrorangko songrangchi, skul kulie master kamna aro toromni giminba skiprakchina watataha. An·tanga uamang baksa skiprakna re·rongaha. Uni gimin ka·singipa aro rinok rinok dakgipa bewal uni chatrorangko aro pilak uko gronggiparangko gisik nom·atna aro Kristoona salbana man·aha. Ki·taprangko see, gitrangko dake aro Sastroko pe·e ua bang·akon Kristian toromona rimbana man·aha. Nishangram songo walni skulko kulieba, ua bang·a manderangko toromna gisik nangataha. Merong jakkepko dondilchengeba, ua me·chikrangni jakchi pamong Procharokrangko rakkie bang·a manderangkon Kristian ong·ataha.

Uni gisik ra·na krae dakanggipa kamara Nishangram songko rike dingtang janggi tanganiko dake donanganian ong·achim. Uan uni antio salsa okimu chake salgimik Isolo bi·chakgipa biap ong·achim. Indakpile ua Isolo pangchaksrangaha. A·chik a·songni ki·tik brichin maikai ta·rakbate aro mangrakbate toromko gipatna man·gen, indake ua an·tangni chatchirangko dingtang dingtang biaprango, a·bachengo Mondolini krongrang gita ong·china districtko duule donataha. Uandake, Ransong saliram bon·chotgipa Shyamnagaro, Rangkuko salgipeng

bon·chotgipa Baghmarao, Omedni jonggipa Maljang Wa·tre Mominko salgro ku·chot Dilmao, Omedko salgro-salaram ku·chot Rajasimlao aro an·tang Damrao donge toromko gipataha. Ua an·tanga bang·a songrangchi songreaha aro krenge kam ka·achi ua uni bilsa 27 kam ka·ani somoirango gimik sak 2200 manderanko napbolataha. Uni indake rake kam ka·ani gimin, uko 1872 bilsini November jao ordain ka·aha. An·tango on·kangsrange kam ka·ani gimin saksani ja·mano saksare·bagipa Missionaryrang, "Uan chingni nambatsranggipa dakchakgipa", "chingni changbatsranggipa aro kakketbatsranggipa kam ka·gipa," aro "chingni jakrimra" ine see donangaha.

M.C. Masonba indake see donangaha: "Indiba aiao inmanpilsranganiara, ua songsarek ong·e atchie, songsarek grimo dal·bahaoba, Kristo gita chacha nambegipa bewalko ia mandena on·anian ong·achim. Angni uko bilsa 17-na u·iano, angni gisik ra·ani gita, uni cholon bewalo anga maming ong·sianiko nikjaha. Uni kattarang je obostaoba tiktak ong·achim. Uo kakketko bate ba komie aganna skani gisik dongjachim. Uni sontolgipa aro gisik ka·singipa, ka·sachakani aro gisik gnangani uko pilak manderangni ripeng aro ka·dongna man·gipa mande ong·ataha. Ua salgini songnokna ine jrimjrim an·tango on·kange Mondolina, bang·a dukrangko aro ma·drangni galchipako minggija kam ka·aha. Anga uni mingsa kamko mamingsaloba gualna man·jawa, jensalo ua an·tangni dedrangni ma·gipakon Mondolini Niam gita Mondolioniko dingtang ong·atna nangaha".

Ia seaniko, Garo Jungle Book - o William Careyni kattachi bon·atna; "Uni kakket ong·ani, an·tango on·kangani aro simsake Kristoni kamna on·jringani biteni chaa dipet bite nanggen." Ua bite chae bite nangangrorokuenga ine da·o aganna man·gen.

Uni gimin ia gimikko nigope, Ramkesan A·chikni nambatsranggipa depanterangoni ong·a ine aganna man·a.

REV. RAMKENI MONDOLIKO RIKNA ARO NAMRORO - SILROROATNA BAK RA·ANI

Rev. Martin Rongrokgre Sangma

Rev. Ramke Wa·tre Momin, A·chikrangni gisepo skanggipa Kristian ong·chenggiparangoni saksa ong·a. Oe, Rev. Ramke aro Omed A·chikrangni gisepo Kristian ong·chenggiparang ong·a. Uamang Guwahati songjinmani Sukleswar Ghat-o 8th Feb. 1863 bilsio Rev. Miles Bronsonni jakchi napbolatako man·aha. Indiba uamangni napbolani tarik Sorkarini aro Mondoli ge·gnini recordni gita dingtanggrikachim. Mondoli ge·gni, chong·motan Rajasimla aro Nishangram Mondolirangni recordni gita Omed aro Ramkeni napbolani tarik 15th Feb. 1863 bilsio ong·achim. Jeba ong·bo, Omed aro Ramke Kristian ong·e, Kristian toromko A·chik a·songona 1864 bilsio ra·bachenggiparang ong·achim. Omed Wa·treparao donge Nama Kattako aganprakaha aro Ramke Damraona re·bae skul ge·sako kulie Nama Kattako aganprakna a·bachengaha. Indake uamang mamasani kam A·chik a·songo ge·gni Baptist Mondolirangko rikchengaha. Skanggipa Mondoli Rajasimla, uko 14th April 1867 bilsio aro gnigipa Mondoli Damra, uko 28th June 1868 bilsio rikaha. Damrao rikgipa Mondoliko ja·mano Nishangramona jitangaha. Indiba mai bilsio Nishangramona jitangaha ukosa u·ina man·jaha, maina uani gimin Nishangram Mondolini recordoba dongjaha.

REV. RAMKENI TOROMNI KAMNA GISIK NANGANI:

Rev. Ramke bi·saintal toromni kamna gisik nanggipa aro toromko sandigipa ong·achim. Beben, Ramke Kristian toromko man·na skang Hindu toromni bang·a sastrorango poraiaha, jekai - Ramayana, Mahabharata, Purana aro Bhagavad Gita. Ua Mussalman toromni sastrò Qurankode namedake ma·sija ine agana. Una agreba Ramke, ma·gitcham pagitchamni torom mite krita ba amuanirangkoba namedaken niamko rakkigipa ong·achim ine agananirang bang·en gngang.

Rev. Ramke, Goalpara Major Jenkinsni kuligipa skulo mamatang Omed baksa poraimitingo aro Policeni kamko ka-miting salrango toromko namedaken sandibeaha ine agananirang bang-en gngang. 1857 bilsio Omed Guwahatiochim; ua gritang Ramkeko Normal Schoolo porajola gita Guwahationa okamataha. Mamatang Omedni okamatako man-on Ramke Guwahationa re-angaha. Unon Omed, gritang Ramkena an-tangni Apati Nashak Bengali tract kingsachi Kristian ong-nagitik ong-ani kattarangko aganaha. Uamang mamasa toromni gimin ning-tuen, badia toromko ra-ode jatang A-chikrangna gamchatbatgipa ong-genchim, uarangni gimin chanchiaha. Ja-man ki-tiko uamang Sahebrangnt torom, Kristian-ko ra-on nambatgipa ong-gen ine chanchiaha. Indiba uamang bakbak Kristianrang ong-ningjaha. Bilsio 6-mangni ja-manosa uamang Kristian ong-aha aro Rev. Miles Bronsonni jakchi Guwahati Sukleswar Ghato napbolaha.

MAN·GIMIN TOROMKO A·SONGTANGONA RA·BAANI:

Omed aro Ramke mamasa Policeni kamko wate Guwahationi re-baon, Omed Wa-treparao donge Nama Kattako dingtang dingtang cholrangchi aganprakna jotton ka-aha. Unon Ramke Damraona re-bae skul ge-sako kulie manderangni mikkana ong-e janggi tanganiko mikaoatan baksa Nama Kattako aganprakna jotton ka-aha. Ramke iana skangba Goalparao Policeni kamko ka-mitingo Damraona watatoko man-aha. Uni giminsa Ramke Damraona re-bae toromko skina miksonge skulko kuliaha.

Jensalo Omed aro Ramke Kristianrang ong-aha ba napbolaha, unon uamang A-chik jatna Nama Kattako aganprakchina aro Missionaryrangko watatchina Rev. Miles Bronsonko mol-molaha. Indiba ua somoio A-chik a-songona Missionaryrangko watatna agitchaa Missionaryrang aro fundba dongjachim. Uni gimin Missionaryrang A-chik a-songona bakbak Missionaryrangko watatna chol ong-jaha.

Omed aro Ramke mamasa, an-tangtangni miksongatangko chong-motan A-chik jatko Kristian ong-atpana skaniko dontongna man-jaha. Uni gimin uamang, an-tangtangni kamtangtangko wate jatangni

ong·gramaigipa toromko ra·aoniko dingtangible, uamangna Isol chong·motko u·iatna aro uko olakkiatna miksongaha. Ia miksonganiko uamang Rev. Miles Bronsonna aganaha. Missionaryrangba ia namgipa miksonganina bakko ra·pana bang·gija dakchakaniko Omed aro Ramkena on·aha. Indake ua cholrangchi A·chik a·songona Baptist Kristian torom uamang mamasachi sokbachengaha. Uan 1864 bilsio ong·achim. Uamang toromtango A·chik a·songona sokbaaton uamangna nengragipa ong·jaha; maina uamang jattangni manderangchin bang·a sinjetanirango, chonnikanirango aro champenganirango chagrongaha. Indiba Salgini Paa uamangko chel·chakaha aro dakchakaha. Uamang, an·tangtangni man·bagimin toromko aganprake bilsio 4-ni gisepon Mondoli ge·gniko rikaha. Uan Rajasimla aro Damra ong·achim.

REV RAMKENI MONDOLIKO RIKNA ARO NAMRORO-SILROROATNA KAM KA·ANIRANG:

Rev. Ramke bebera·atango mangrakgipa aro kimkingipa ong·a ine uni daka kamrangni gimin segimin ki·taprangoniko poraie nikna man·a. Ua, an·tangnasan Kristian toromko bebera·aijaha; indiba an·tangni manderang maikai Kristian toromko bebera·e janggi jokna man·gen, iarangni giminba ua raken chanchibewalaha. Ka·mao uni Mondolico rikna aro uko namroro-silroroatna miksonganirango kan·dik kan·dik sea.

(a) Skul kulia: Rev. Ramkeni Damrao skul kulianio minggni miksonganirang gnang. Skanggipa miksongani: Jattangni be·enni gita mikkana ong·e janggi tanganiko mikaoatna, jedakode uamang a·gilsako apalbate nikpae janggi tangpana man·gen. Gnigipa miksongani: Janggini ba gisil mikaoe Isolni, Jisuni aro Gisik Rongtalgipani gimin segiminko nikpae aro poraie papni wario ga·ake dongaoniko naljokatna man·gen; iana miksonge skulko kuliaha. Indake Ramke 1864 bilsio Damrao skulko kulie Nama Kattako aganprakna a·bachengaha.

Rev. Ramkeni kuligimin skulona adita songrangoni chatrorang poraina re·baaha. Ua an·tangni chatrorangna a·gilsak aro toromni gita nama skianiko on·aha, maina Ramke a·gilsakni lekka-porakosan

skiaijaha; toromo maikai name janggi tangna man·gen, iarangni giminba name skiaha. "Uni gimin uni skulko Bible Seminary gitaba chanpilachim." Ua attamo aro pringo Isolo bi·dilaha aro Sastrorangko poraidilaha.

Jensalo Rajasimlako skanggipa Baptist Mondoli ong·ataha, unon American Baptist Mission, Assamo Missionary ong·e kamko ka·enggipa Missionary joragniko A·chikrangna kamko ka·china ine Goalparaona watataha. Uamangara Rev. I.J. Stoddard aro Rev T.J. Keiths aro uamangni jikgiparang ong·achim. "Damrao Ramkeni kuligipa skulko Governmentni on·gimin tangkachisa kuliachim aro uko nirok-sandinara Missionaryrangni jakonchim." Unon Rev. Stoddard wachikario skulko nirokna namen neng·ani gimin bilsio jabribrina Goalparaona skulko ra·angrongachim. Ja·mano Damraoniko Turaona skulko jitangsrangaha.

Ramkeni skulni chatrorang neng·takani salo, chong·motan Robibar salo, sepangbatgipa songrangona ba gittimrangona sakgnigni dake Nama Kattako aganprakna watatako man·rongachim. Ian Ramkeni toromni kamna gisiko nangchongmotaniko mesoka aro man·ode Mondolirangko dingtang dingtang biaprango rikna miksonganirang ong·achim. Uni skulo poraigipa chatrorang bang·batan Mondolini dilgiparang, pamongrang, skulni skigiparang aro sorkarini kamo namgipa kam ka·giparang ong·aha ine agananirang gnang.

(b) Merong jakkep donani: Rev. Ramke, Nishangram Mondolini pamong ong·ahaon, ua maikai aro mai cholrangchi rikgimin Mondoliko tange aro name rakkina man·gen, iana walang salang raken chanchina nangao ga·akaha, maina Nishangram Mondoli ong·ahaon a·bachengao nokdoksanpittichim. Mondoliko rikani aro uko namroro-silroroatna uni am·e man·gipa cholrangoni mingsa uan merong jakkepko chimongani ba donani ong·achim. Ua nokni me·chik sakprak pattiprak mi song·na ra·giminoniko jakkepprak ra·e uko Isolna on·anichi rikgimin Mondoliko namroro-silroroatna man·gen ine nikaha. Haida Rev. Ramke ia an·tangni namgipa chanchigiminko jiktang Suboninaba aganchengengnaba donga aro merong jakkepko donchina ge·etanirangba dongengnaba donga; ong·jaode sakgipinrangko ia namgipa chanchianiko chu·sokatna bilgrichim. Merong jakkepko dondilchenggipa me·chikmani gimin Ma·a

Nobimoni B. Sangmani aganani gitade Ramkeni jikgipa Subonian ong·achim. Ua agana, "Angni ambitang aro ma·gipa chingni chonengmitingo agana, merong jakkepko Nishangram Mondolio dondilchenggipara Ma·a Subonian ong·a. Jasao merong jakkepko chimonge nion se·elgni adha ong·a aro uko palon anna bonga ong·achim." Iako nikesa Rev. Ramke, merong jakkep donachi rikgimin Mondoliko tange rakkina aro namrora-silroraatna man·gen ine nike, an·tangni sa·rao ba wal·timona bebero·rimska Mondolini adita memberrangko okame merong jakkep donani gimin chanchidilchengaha. Ia tom·anio Ma·a Salje K. Sangmaba dongpaachim ine agana.

Beben Nishangram Mondolini aro Krima No. 1-ni itihasi gitade merong jakkepko dondilchenggipako Ma·a Salje K. Sangmako janapa. Ma·a Salje K. Sangma merong jakkepko donanina me·chikmaskarangko gisiko nangen didibeaha aro jaksrame me·chikmaskarangko dondilaha. Rev. Ramkeni ja·manomangba Ma·a Salje K. Sangmako Snilla Sobhako (Krima) rikanioba merong jakkepko donchina gipin gipin Mondolirangona re·dilna rakkiaha. Uan Rev. Gongman M. Mominni somoio ong·achim.

(c) Bakchikkingni Baksako Dondila: Mondoliko name rikna, kam ka·giparangna namkala dormaharangko on·na aro Nama Kattako giproraatna man·na gita Rev. Ramke bakchikkingni baksako dondilaha. Bakchikkingni baksako on·na nangania Sastroo ge·etgimin ong·a aro iani gimin Sastroo bang·en janapanirang gnang Levi. 27:30 Chanani 18:26, 28; Deut. 12:17; 14:22; Malaki 3:10; Mati23:23; Luk 18:12; Ibrirang 7:8. Oe, Israel manderang toromtangko, uno kam ka·giparangko tange rakkina, torom nokko rikanirangna aro nitoatanirangna bakchikkingni baksako on·anichi rikaha aro jakkalaha. Rev. Ramkean A·chik bebero·giparangni gisepo ia kamna mikaochenggipa aro Isolna bakchikkingni baksako on·anichi Mondoliko rikna aro Nama Kattako giproraatna chanchidilchenggipa ong·a. Dinisin D. Momin agana, "Rev. Ramke Nishangraun Mondoliko tange rakkina, an·tangan bakchikkingni baksako on·dilchengaha. Una agreba ua Isolna dingtang dingtang on·anirangchi Mondoliko rikna krengdilchengaha."

(d) Kamna Sakgipinko Train Ka·samsoani: Mondoliko rikna aro namroro-silroroatna namgipa dilgiparangko nanga. Namgipa dilgipa gri je organization ba society ba dolkoba rikna amja. Darang dilgipaba chasong gimik ba janggi tanga gimikde dilgipa ong·na man·rongbreja. Rev. Ramke, chasongtango namgipa dilgipa ong·achim; indiba ua, an·tangni ja·mano Mondoliko rikdilna aro namroro-silroroatna Rev. Gongman M. Mominko pamongni kamna tarisoaha. Indiba Rev. Gongman, Rev. Ramkeni an·tangko pamongni kamna train ka·samsoaniko u·ijaha. Je dilgipaan an·tangni ja·man dolko ba societyko ba organizationko re·dilna tarisoja, ua dilgipa namgipa dilgipa ong·ja. Rev. Ramkeni, an·tangni ja·mano dilgipa ong·na Rev. Gongman M. Mominko tarisamsoania A·chik Mondolirangna mesokanina ba modelna chong·mot ong·a.

Rev. Ramkeni Kamrangni Gimin Agankuanirang:

Rev. Ramke bebera·atango kimkingipa aro mangrakhgipa ong·a. Ua toromtango nambatatna aro namgijako gimaatna jotton ka·gipa ong·achim. Pa Dinisin D. Momin agana, “Ua an·tangni sa·rao dal·gipa bol pangsaiko be·atna miksonge, uni ja·pango rua mangsaiko namen wil·e donrongachim. Unon uona rona re·bagiparang salantian uko on·tiprak den·e uko be·ataha.” Iako uni dakani miksongania, namgijako gimaatna, chong·motan satanni sason aro budirangko gimaatna ong·achim. Sastroo agana, “Aro bolrangni ja·pango da·oba rua dona gnang; uni gimin nama biteko nanggijagipa bolantiko den·pee wa·alo gala.” Luk 3:9. “Uasan ong·aigija Rev. Ramkeni babilsa apsalio pangnan gue den·e aro pan chite donrongachim.” Iko ua an·tangni jikgipa Suboniko dakna ge·etani miksonganiara, uni alnamaniko, jaksramaniko aro sokachakanio mandera·aniko mesokanina ong·achim; maina A·chikrangni bewal nokona sokbagipa-nabagipana ba rogipa - chogipana dakchengna nanggipara ia ta·makku aro gue·panko on·chenganian skanggipa ong·a. Unon noksokgipao chol dongpagenchimode chu cheke, cha rite, mi·bijak song·e·rite on·anirang A·chikrango gnangchim.

Ma·a Nobimoni B. Sangma agana, “Rev. Ramke, an·tangni noksam samba gita Damra antio re·gipa A·chik jongada noabirangko nikon noktangona okamate, jiktangko uamangna menilko song·e aro chako rite on·china ge·etrongachim aro ramao cha·namangba on·atrongachim. Unon uamangna somoini kri Nama Kattako aro songsarko rikani gimin skiatrongachim.” Iako uni dakani miksongania jattangna ka·saaniko, simsakaniko mesokna aro ong·gramaigipa toromko ba mité kritanirangko wate jringjrotni janggina pangchakani Isol Jihovao aro Uni Depante Kristo Jisuo ong·a ine mesokanina ong·achim. Iarangna agreba, Rev. Ramkeo jattangna ka·sae aro simsake dakani kamrang bang·en dongkua.

Bon·atani :

Rev. Ramke W. Momin, A·chik jatni gisepo dingtangmancha jatna ka·sagipa, pilaknan namgniko dakna siggipa, toromko, chong·motan Kristian toromko A·chik a·songo aro gipinrangoba giproroatna siggipa aro manderangni janggi tanganiko mikaoatgipa ong·achim. Uni skul kuliani, Nishangram Mondoliko rikani, a·a pue game sue cha·dilani aro dingtangmancha bebera·giparangko damsan nokrik·nokdake dongdilani, pilakan A·chik jatna mesokani ong·achim. A·chik a·songni me·chikmarang Rev. Ramke gita dakgipa depanterangko ba·taikugenma? Rev. Ramkeko ba·gipa ma·gipa namgipa, ka·sagipa, pilaknan namgniko dakna siggipa aro jattangni mikkana ong·e dongeoniko aroba torom gri janggi tangeoniko mikaoatgipa depanteke ba·nangaha. Oe, Rev. Ramke, A·chikrangni gisepo aski rongsa ong·chongmota. Da·o uni nama kamrangko aro gisik ra·na dake donanggimin kamrangko A·chik mande sakanti ja·chongrikna aro kamko ka·na nangenggiparang ong·a. A·chik panterang aro me·trarang bang·a bilsirangna tusibeaha. Da·o mikrakani sal ong·jok! Chasongtangni ja·mano chasonggipino dongrikenggipa chasong gitalni dambe pante aro me·trarangna maiba nama kamrangko donangpana nang·ni aro angni kamrang ong·a.

1. F.S. Downs, The Mighty Works of God, Gauhati : CLC, 1971 p.48
2. William Carey, The Garo Jungle Book, Tura: Tura Book Room,

Reprinted 1966, p. 69

3. Downs,..... Works of God, p. 49
4. Martin R. Sangma, The Garos and Christianity, Unpublished material, p. 50
5. Ibid. p.50
6. K.I. Aier, The Growth of Baptist Churches in Meghalaya, Gauhati: CLC, 1978, p. 42
7. Carey, Jungle Book p. 122
8. Ibid. p. 122
9. Ibid. p. 122
10. Ma Nobimoni B. Sangma, one of the members of the Nishangram Baptist Church. Interview at her house, Nishangram, Goalpara Dist. Assam on 5th December, 1990, Taken her valuable sayings.
11. Pa Dinisin D. Momin, one of the leaders of the Nishangram Baptist Church. Interview at his house, Nokmakundi. Dist. Goalpara Assam on 5th December, 1990. Taken his valuable sayings.
12. Ibid.
13. Ibid.
14. Nobimoni, interview, 5th December, 1990

RAMKE WA·TRE MOMINNI NOKDANG BA·KU DAKANIO A·CHIKNA ON·PAANI

Arjison Gabil Momin, Tura

Ramke Wa-tre Momin 1833 bilsi mango Wa-trepara songo atchiaha. Uni pagipako Nawing Rangsang Marak aro ma-gipako Noring Wa-tre Momin mingachim. Bi-sa intal Ramke kamna gisik nanggipa aro skie ra-na sikbegipa ong-baaha aro ma-a-paani pilak kamrango dakchakpaaha. Ua kilometre dokmang salanti ja-achi re-e Bengali Sorkar saksao sea-jotaniko skie ra-aha. Pagipa uni chommitingon sie, da-o uni wanggipa uni indake skie ra-aniko namnikjaha. Ua adita alphabetko skie ra-mitingo, uni indake skie ra-anikoba dontongna nangaha. Nokni dal-batgipa bi-sa ong-e ua rakbee kam ka-pana nangachim. Ua changbrina kingking a-sel ong-aha aro bon-kamgipao ua mata bu-ako man-an baksa, uni jakasini jakni be-en aro ja-dilrang bnekaha. Indioba maiba miksonganio Isol uko an-sengatpilaha aro ja-mano wanggipa Reban pagipa baksa poraina Goalparachi re-angaha. Indiba uni be-en bilgriani gimin uko skulo donna skigipa jechakaha. Jeba ong-bo uko ja-mano jenten ra-chakaha. Ianonin uni janggi tanganina uni skie ra-ani bidingo ua namroroaha aro uamangni gisepo chu-sokbatgipaba ong-aha.

Iano ua A-chik ong-e A-chik jatna aro uni namroro-silrorognina nokdang ba·ku dakani bidingo maiko dakachim uarangkosan janapenga. Ramke Kristian ong-mano mamatang Omed baksa kamtango watenba a-songtangona re-bapile, an-tangni gital torom aro u-ianikosan an-tangni ka-sabegipa A-chik jatna on-na miksongaijaha, indiba jarang baksa maikai nambate aro chu-sokbate mande janggi tangna man-gen, indake ua nokrik nokdakanio aro gama suanio A-chikrangna pangkamgipa dakmesokanikoba donangaha.

Ramke Damrao ma-chake uni kuligimin skulni Head Master ong-e chalaimitingo, kilometre bri ba bongako re-e buring bolgrimo saksan Isolo bi-rongaha. Iakon Moseni a-briona re-ange Isol baksa agangrikani gita chacha William Carey toaha. Ia diltugipa buring bolgrimara da-o

dal·begipa A·chik Song Nishangraman ong·a.

Ramke uni gritang Rangkuko rime, 1867 bilsini bon·angachibara ia buring bolgrimona re·ange uko namedake nieaha. Ian A·chik manderangni a·kawechipakna napram aro Damra antiko cha·na gita re·pakram ong·a ine nikaha. Iano songdonge namgipa Kristian songko rikon uko manderang nikgen aro ianon uamangna Isolni Nama Kattakoba skina man·gen ine nike, ua 1868 bilsio buring bolgrimko o·e uano songdongdilna a·bachengaha.

Ramke ia apalbegipa a·kaweko buring pe·e a·pal jominko dakna man·ode, manderangna salgini mannako on·enga gita chacha chu·onga gita cha·aniko man·gen aroba je jeo gamna suna man·jawa indakgipa biaprango manderangna namgipa bolam biterangni bari baganko dake, uamangna chu·onga janggi tangani cholrangko man·gen ine dakdilna mangsongaha.

Iarangko chu·sokatna Ramke aro uni bang·gijagipa kotokna altubeade ong·jaha. Mongsongbate pangkamgipa game sue cha·aniko on·na man·na gita uamang apalbegipa aro diltubegipa buring bolgrimko pe·e rongtalatna nangaha. Dal·dalbegipa bolsal aro ugita rakgipa bolrangko supee aro uarangni ja·pang ja·tingrangko pike galna nangoba matburingrang bang·ani gimin uarangko champengna nangaha. Bol ja·dil ja·pangrangko pikmano a·klokrango a·ako gapatna nangaha aro a·timborangko a·pal apsan ga·nangatna nangaha. Tarigimin a·pal jominko game sue cha·na chiko man·na na·gilko kaaha, jekon da·o Dandalma ine minga.

Songdongchenggipa Kristianrang bang·jani gimin uamangna pangkamgipa na·gilko kana namen neng·beani ong·achim, maina kaa changantian chi pe·taitaiaichim. Rasong gnangbee indakgipa a·sel ong·aha; attamsao Damrani mahajon saksani gureko dal·begipa matcha buringo cha·amengako chikangaha. Matchako gona Rangkuna agre darangba ka·sokgipa grichim. Rangku uko un walon gogen ine ku·rachakaha aro goaba goaha. Pringo uni bigilko kike Goalparachina ra·angaha aro Sorkari una tangka Gong· 25/- ko boksisi on·aha. Ia tangkachin ua mittai aro merongko brebae duulao donggipa A·chikrangko okamate uamangni dakronga gita chuko on·gija miko song·e on·e, kamko

dakchakpachina aganon ritchani ritcha A·chikrang re·bae dal·begipa na·gilko kaanio dakchakpaaha. Ian pangkamgipa na·gil ong·aha ine agana. Iana skang uamang kilometresamang donggeko cho·chengna nangahachim.

Iarangko dakmano, 1880 bilsini October 6 tariko Sorkarina dorgastoko on·enba, a·pal jomin gimikko toe on·china mol·molaha. Sorkari uko toe, apala gimik bigha 3,333 ong·achim ine janapaha. Ua a·pal gimikkon Rev. Ramke Mominni bimingo gatdime on·aha, jekon Lot Patta ine agana.

Kosako janapgimin gita Ramke A·chikrangna maikai pangkamgipa game sue cha·aniko dakna man·gen, indake ia neng·begipa kamko dakdilaha. Iarang baksana maikai bari bagan dakeba nambata gadango janggi tangna man·gen, indake rokomari namgipa biterangko on·na amgipa bolrangkoba ge·e mesokdilaha. Missionaryrang Australia, Phillipines, Sri Lanka aro indakgipa a·songranganiko nambata bitchilrangko ra·bae A·chikrangna ge·e mesokdilaha; uaranga jambura, dalim, modipol, letchu, miskuri, komila lebu, pispol aro uagita. Iarang baksana bari bagan, sa·ra nokkrarangko nitoatna rokomari pulrangkoba ge·dile, iaranganiko ra·rikrikange, da·o A·chik songsongantion gitcak, rimit, tangsek, gipok nitoriri ge·engkua. Nishangram jolo da·oba gue bagan, te·rik, letchu, jambura, narang, komila lebu, anaros baganrangko nikengkua. Iarangan Ramkeni A·chik jatna rippinganggiparang.

Ramke songni nokni silroroanina aro an·seng baljokanina namedaken gisik nanggipa ong·achim. Bari bagan, noksam nokgilni rongtalaninaba ua gisik nangbeaha aro indake an·seng baljoke, mikkim rasong gnang A·chik jatni songdong a·chaaniko ua nangnikachim aro indaken dakeba mesokangaha.

Uni dambemiting somoio Ramke ma·a paa baksa donge janggi tangmiting somoirango, a·ronggako game cha·ani bewalo dal·baaha. Indiba ua an·tangan dilgipa ong·e, jatni silroro namroroanina kamko ka·angon aro uarangko ra·bana gita an·tangni bil amadipet kamchi mesokengon, ua a·ronggako game cha·aniko didijaha. Beben ua daka rikani ba indonga janggi tanganio pangchakgniko dakpana uo chol aro somoiba dongjaha. Uni miksongania maikai A·chik manderang gital

bebera·aniko man·e janggi tangasan ong·aigija, uamangni janggi tanganio maikai chu·sokbate aro chu·ongbate janggi tangna man·gen indakgipa cholrangkosan ua do·ga oe on·chengaha. Ua cholrangara lekka·pora aro game sue cha·anian ong·achim. Indake ua chasongtangni manderangna uni chanchibewalanio, uni niksamsoe kam ka·anio, jatni dal·roro·silrorognina daksoanio, songsarko rikna tarisoanio namen skangsoaha.

Ramke ka·sachakgipa aro jaksrambegipa mandeba ong·a ine uni gipin kamrango mesoka. Uni depante Dhonsing jean Serampore College-o poraiengachim aro uni demechik (uo de sakgnisanchim) saksani ja·mano saksa jadokni gisepon siaha. A·gilsakni gita bika a·dram be·ani ong·genchimoba, uni bebera·anio pangkame ua uamangni jakkalgni korosni pal tangka Gong 177, anna 10. pel 3-ko Missionaryrangna gipinko dakchakchina on·aha. Ia tangkara uni pamong ka·e bilsisani dormahana batachim. Ua indake seaha: "Dhon tangkugenchimode ua Gitelna kamko ka·genchim. Ua da·o re·angsoahani gimin saoba uni palo ka·na sigkipana dakchakchina anga on·atenga". Ua an·tangni dedrangko poraiatna darangni dakchakanikoba bi·jaha. Apsan gitan ua Mondoli a·bachengaonin an·tangtangni pilak korosrangna Mondolitangan on·na nanga ine mesokangaha. Uni gipinni dakchakaniko bi·ako serikani ba aganritingani gri. Ua Mondolini chu·gimik jakgitele janggi tanganiko nangnikachim.

Ramke kangal cha·asigiparangnaba simsakachim. Ua me·chikrangko salantio miko song·on, me·chik sakprakna jakkepprak song·na skang donchina me·chikrangko didiaha aro ku·mongaha. Indake uni agana gitan me·chikma saksa Salje K. Sangma uko dondilaha, jekon da·o merong jakkep ine agana. Iako donna miksongania maikai kangal cha·asigiparangna dakchakna man·gen indake ong·achim. Robibar changantin ia chimonggimin merongko gilja jokmano kangalrangna dam nom·e palrongachim. Iaba uni kangalrangna ka·saani chin.

Ramke A·chikskana ka·saa aro A·chikskanan bon·kamaona kingking janggi tangaha. An·tangni janggi tangani gimin kan·dikgipa seanio, skia man·gipa A·chikrang maikai jatangna ka·sana nanga aro jatangni dal·roro silrorognina kam ka·na nanga, an·tangni tikkelanirangko janapaha aro

gisik nangatbeani ku·pattiani kattarangko aro ku·mong nangrime ku·cholsan janggi tangani namgnirangko seaha. Uni janggi tanga gimik tikkelaniera A·chik jatna gital bebera·ani aro gital toromkosan on·na miksongaijaha, indiba Jisuni agana gita maikai manderang chu·onge aro chu·sokbate janggi tangna man·gen, indake ua kam ka·aha aro gipinrangkoba indake dakpachina didiangaha. Da·alo, 25.1.91 tariko, uni siani bilsa ritchasa ong·aniko gisik ra·engon, A·chik sakanti uni donangginamin gamsengko ripingna, rokomari cholrangko dakna man·genchimode, mairongpile namgenchim. Uko gisik ra·aniko dakengon, una nambatgipa on·skaani aro uko mittelpilaniara, an·ching sakanti uni gunko an·tangtango tangchaatna aro uni ka·sagimin A·chik jatni silroro·namroroani bidingo maiba namgipa aro kragipa kamko jatna aro a·songna dakna. Uan uni de su·drangni uko mittelpilani kam ong·gen.

Reference:

1. The Garo Jungle Book: W.Carey, Published by the Tura Book Room, 1966 ed.
2. Nishangram Mondolini Bilsa 100-ko Gisik Ra·ani, Nishangram Baptist Church, 1968.
3. A.chik Baptist Dal·gipa Krimako A·bachengani, 1874-1974. Garo Baptist Convention, Tura, 1974.
4. Rev. Ramke W. Mominni Janggi Tangani: K. W. Momin, Published by Krima IV, Tura.
5. A·chikni Ripeng: Centennial Issue, 1967 series.
6. Rev. Ramke W. Momin: Autobiography - Govt. of Meghalaya, Department of Arts & Culture, 1991.

REV. RAMKE WA·TRE MOMIN: UNI SALGRO-SALARAMNI BAPTIST MONDOLIRANGNI ITIHASO MONGSONGGIPA BIAPKO MAN·ANI

Lindrid Dalbot Shira, Tura

Aganchengani :

Rev. Ramke W. Mominni janggi tangani aro Isolni Kattako gipatna kam ka·e Mondolirangko A·chik a·songo bariataniko niode, ua dingtangmancha Council of Baptist Churches in North-East Indiani (CBCNEI) itihaso mongsonggipa biapko man·na krachong·mota. Ramke aro uni mamatang Omedsa Assam Missionko Assamo pangkamataha aro mangrakataha. CBCNEI·ni itihasko seode iamang mamasako watchangna man·jawa aro uamangko watchangode, uan chu·sokgipa itihaso ong·jawa. Kakketko aganode, uamang sakgnikon da·alo maming jajaani grian “CBCNEI·ni Pagiparang” ine aganna man·gen. Uamang mamasan Assam Missionni itihasko dingtangataha! Ramkeko seode mamagipa Omedko watchangna man·jachim.

A·chikrangosan ong·aigija, Indiani salgro-salaram jolgimikon Ramke gita dake chu·soksranggipa mandeko man·taina neng·chongmotgen. Ua nambegipa Kristian dilgipasan ong·aijaha, indiba songsarko rikanio, manderangni cha·a·ringanio, kam ka·anio, sea·jotanio, lekka·porako skiani aro indakgiparangoba uan skanggipa dakdiligipa ong·aha. Uni kam da·ororoni theological term-o agangipa gita “Holistic Ministry” ba “Total Ministry” ong·chongmota. Indakgipa uni kamrangko nike saheb-subarang aro pilakan aiao inmana.

A·chik A·songona Kristian Toromni Sokbaani:

A·chik a·songona Kristian toromni sokbaani pilak gipin biaprango gita ong·ja. A·chikrangde a·bachengode Missionaryrangoniko Isolni Kattako knae Kristian ong·giparang ong·ja. Ramke aro Omedde an·tangtang chong·motgipa toromko am·esa Kristian ong·aha. A·chik a·songo Kristianrang ong·katchenganiba aro 1867·ni April 14 tariko

Rajasimlako Mondoli songaniba Missionaryrangni kamchi ong·jaha, indiba Gitelna ka·sagipa A·chik Missionary sakgni Ramke aro Omedni nambegipa bebera·ani kamchisa ong·aha. Indake Kristian toromni A·chik a·songona sokbaaniara A·chikrang an·tangtangan an·tangtangna kam ka·achisa ong·aha. Ia pilak gipin biapo Kristian toromni napanioni namen dingtanga.

Assam Missionni Mangrakgijani :

Baptist Mission 1836 bilsio Assamo napchengaha. A·bachengo uamang Burmani salgrochi aro Chinani salgipengchi donggipa Shan jatrangna Nama Kattako aganprakna Sadiya aro Jaipurosa dongchengaha aro kam ka·aha. Indiba ja·mano ua jolo kam chu·sokjani gimin Assamni a·kawerango uamang kam ka·skaaha.

1841 oni 1843 ona Assamo Mission Station ge·gittamsan dongkuaiengachim. Uarangan Mondolirangba ong·jolaiachim. Uaragara Sibsagar, Nowgong aro Gauhati. 1851 bilsio Sibsagaro Baptist Association of Assamni antigittamna tom·bimonganio report on·a gitade, Baptist Kristian member gimik sak 85·san ong·aiachim aro uamangoni sak 20·de sahebrangsachim. Indake ru·ute kam ka·oba Assam Mission bilakna man·jaengachim. 1850 bilsio uamangni seani gitade a·brini jatrangkosa Kristoona altuae salbana man·aigen ine Missionaryrang talen u·iaha. 1855 bilsio Home Boardni Secretary Assam Missionko niani ja·mano, indake aganaha: “Assam Mission, je jatrangon kam ka·tobatgenchim, uamangona Isolni Kattako sokatkua - uamangara a·brini jatrang. Angni nikani gita Assam Missionna ka·donganide a·brini jatrangmangmansan ong·aia.”

Ua somoimitingo Burmao American Baptist Mission kam ka·e hajalni hajal Karen jatrangko Kristoona salbana man·engachim. Assamo donggipa Missionaryrangba Assamo “Karen” jatko nikna ka·dongsoengachim. 1854 bilsio uamang indake aganaha, “A·brini jatrangkon Karenrang ine aganna man·gen.... chu·onga gita uamangna kam ka·giparangko man·ode, Burmao gita apsan biteko rana man·gen.”

Missionaryrang ia pilakko u·ioba, kam ka·na chu·onga gita mandèrang dongjachim. Unbaksa Assamo “Karen” jatko man·jaode Assam Missionkoba tangkamatna man·jawachim, maina bite gri

Missionko Home Board rakkidamjawachim. Uni gimin uamang Home Boardko namnikatnade bakbakan Assamo nama biteko mesokna nangengachim.

1858 bilsio Home Board Assam Missionko “bite komia” ine chipsrangna chanchiahachim. Ua somoi tiktako Rev. Miles Bronson Americao dongengachim. Ua Assam Missionko chipkujachina Home Boardko mol·molaha aro uni mol·molako knachakgija Home Board Assam Missionko chipdraoba, uamang songtangchi re·bapilgija Assamo saksa sakgni bebera·gipanamangba kam ka·gen ine aganaha.

Ramkeni Kristian Ong·ani :

Ramke W. Momin 1833 ba 1834 bilsimango Matchokgre songo atchiaha. Bi·saonin ua toromna namen gisik nangachim. Ua A·chikrangni bebera·a gita sia aro atchitaiani gimin chanchie jajrengongaha.

1847 bilsio Capt. Francis Jenkins Goalpara Sorkari Schoolko kuliaha. Uano poraigiparangoni mongsongbatgipara Ramke aro Omed mamasa ong·achim. Ramke bilsisa ja·manchakesa poraina re·baaha. Bilsigittammangna poraiani ja·mano Omed police-o napangaha, indiba gritang Ramkede poraianguaha. Poraimitingoba ua janggitangni gimin chanchirongaha aro bate bate uni gisik dongtororojaha. Ua Hindu sadhurangkoba grongaha aro uamangni skianirangkoba gisik nange knatimaha.

Poraimitingo, salsao ua Songdusamo sahib saksa aro Bengali babu sakgnini ringo gakate skianirangko knaaha. Ua sahebara Daccani gisik nangbegipa Baptist Missionary Rev. Rupretch Bion ong·achim. Gipin jat sakgnioni saksade Rev. Jivan Babu ong·achim. Uamang bang·a chonchongipa ki·taprangko sualangaha. Ramke uko skulo chitti kal·e kingsa man·aha. Ua ki·tapni bimingara “Apati Nasak” ba “Pa·sikaniko Gimaatgipa” ong·achim. Ua ki·tapara Hindurangko aro Mussalmanrangko galone seachim. Ua a·bachengo Hindu sadhurangni skianiko bebera·e janggi tangbaani gimin uamangko galone segipa ki·tapko namnikjaha.

Salsao Ramke jumang nikaha. Uni jumang indake ong·achim - Saksa changrogipa mande sabukko ra·e, uko skango gita manijaha aro una

ka·sajahani gimin ka·onange, mikgitching nie manengaha. Indakgipa jumangara uni maiba Bilakbatgipa Isolko sandiani gimin ong·aha ine ua ma·siaha.

Gauhati Normal Schoolo poraimitingo salsao Ramke jumangchi gita mamatang Omedna aganaha, "Mama, atchiramasa gnang ine da·o an·ching bebera·a; indide a·gilsako nama namgija kamrangni biteko ba sastiko atchiramasachi man·na nanggen. Uarangori jokna gita aro suk ong·e katchae dongna man·na gita, maiba mingsa toromko ra·na nangchongmotgen. A·gilsako torom bang·benaba donga, indiba anga chanchia, Hindu Mussalman aro Sahebrangni, ia minggittam torom pilakna bate dal·batakon; ia torom minggittamoniko badia toromko na·a segen?" Mamatang adita chanchienba aganaha, "Anga Mussalmanrangni toromko mamingkoba u·ija; uni gimin uko namnike sena amja. Aro Hindu toromko ra·ode, jatang, bakdrang, ripengskarang aro jongada noabirangming dakrimpana cha·rimpana man·jawa. Uni gimin Hindu toromkoba ra·na sikja. Sahebrangni toromko ra·ode, ripengskarang, jatskarang aro jongada - noabirang baksa skang gita cha·rim·ringrimpana man·gen. Uni gimin badiaba mingsa toromko ra·chongmotna nanggenode, sahebrangni toromko ra·nan angade namnikbatgen." Ian namen itihaso gisik ra·na aro see dorina krachong·motgipa ong·a. A·chikrang saniba draana, maiba boksisko man·gnina aro maiba a·selni gimin toromko ra·jaha; indiba an·tangtangni janggina nangchongmotgipa aro jatangna namgni ong·batnakgipa toromkosa name chanchie seoke ra·aha. Uamango toromko baseanio taningtangko jakkalaha.

Haida Isolni Donsoan Ong·akon:

1857 bilsio salsao Omed Gauhati Mission compoundo donggipa bungalow ge·sako dongtimengachim. Unon ua Bengalichi segipa chonggipa ki·tap kingsako man·aha aro uara gritang Ramkeni man·gipa apsan "Apati Nasak" ba "Pa·sikaniko Gimaatgipa" ingipan ong·achim. Ua ia ki·tap bi·sako poraie Kristian toromna gisik nangna a·bachengaha. 1859 bilsio Omed Bengali Kristian contractor saksa, Samuel Lovedayko grongaha aro Loveday Omedko Gauhatini Pamong Kandura Smithona rimangaha. Indake Kandurani skie on·achi ua da·o Kristoko ra·chake napbolna

an·tangko tariaha.

Ru·utgijan Ramke Gauhatio mamatang Omed Kristian toromko ra·na am·engaha ine knasoaha. Ua jak samsa namjani gimin uko policeni kamoniko wate galaha. Ua joljol Gauhatichi re·ange Chief Commissionerni officeo clerkní kamko man·eaha. Gauhatian ua mamatang Omed aro Kandura baksa Kristoni gimin agangrikaha. Indake da·o uamang mamasan Kristian ong·na tariaha aro 1863-ni February 8 Robibar salo Gauhati Songdu rikam Sukhleswar Ghato Rev. Miles Bronsonni jakchi napbolatako man·aha.

A·songtangona Missionary Ong·c Re·baa:

Bilsisani ja·mano chong·motan 1864 bilsio, Ramke aro Omed Rev. Bronsonko Gauhatio grongtaion, a·songtangona missionaryko watatchina aganaha. Saoba indake Nama Kattako A·chikrangna aganprakna re·ode, uamang mamasaba kamtangtangko wate re·pana aganaha. Indake darangkoba watatna dongjani gimin, Bronson uamang mamasakon songtangona Nama Kattako aganprakechina watataha aro sakprakna japrakto Rs.10/- ko on·na ku·rachakaha.

Uamang mamasa aro uamangni jikdrang Gauhatiko wate re·bae Goalparaona May 10 tariko sokeaha. Songtangona soke Ramke Damrao donge panterangna skul kuliaha aro mamatang Omed Rajasimlao donge Nama Kattako aganprakaha. Ramke Damrao donge skulkosan ka·aijaha, indiba an·tangni chatrorangna Nama Kattako skiaha aro Damrao bajaro aro wilwila songrangoba, Isolni Nama Kattako skiprakaha.

Kosako janapgimin gita A·chik a·songona Nama Kattako aganprakchenggiparande Missionary sahebrang ong·ja, indiba A·chik sakgni Ramke aro Omedsa. Ia missionary sakgniba sahebrang·ni skianiko knae Kristian ong·jaha; indiba an·tangtang "Bebe" - ko am·esa uko man·e Kristian ong·aha. Ian Church History-o see donna krabegipa ong·a, maina u·ibegipa manderang ba scholar-rang ianan namen aiao inmana.

A·chik A·songo Mondoli Songchenga:

Ramkeko Damrao skul kulichina donatoba, pilak skul ka·ani aro Isolni kamrangko ka·aniba uni an·tangnisian ong·achim, maina darang missionaryba una kamrangko ka·china skie on·jaha. Omedba Rajasimlao Rongjuli anti ramasamo noktop rike anti re·bagiparangna Nama Kattako skiprakaha. Ia bewalba Omed an·tangni chanchie kam ka·anisa. Uamang skia man·a chu·ongpajaoba skia man·begipa aro namen theological-trained manderang gitan Mission Strategy·ko an·tangtangna tariaha. Ramkeba skul skigipa gita maikai mandeskako Kristoona salna man·gen aro Omedba maikai manderangko Kristoona salna man·gen cholrangko an·tangtangna bikotaha. Ian aiao inmanbeani ong·chongmota.

Isolni kamko ka·anio Ramke aro Omed mamasani pakripe namen melia. Sakgnian chong·motgipa Kristoni sipairang ong·e a·gilsakni u·iani ba bilo pangchakjaha, indiba Isolosa pangchakaha. Omed salantian bolchu bolma ja·pango indake Isolo bi·rongaha, "O Isol, ia bolchu bibalrangko pilakchin balwa balpakanga gita, Nang·ni Kattakoba A·chik songgimikchin gipatbo." Gritang Ramkeba antio salsa uni chatrorang baksa okimu chake bi·an baksa, salantian bolsalgrimona re·ange ja·sku dipane Isolo bi·rongaha.

Indake uamang mamasani melie aro bimchipe Gitelna kam ka·achi bang·a manderangko Kristoona salbana man·aha. Uamangoni saksaba napbolatna bil dongjachim. Uni gimin Kristian ong·na sikgiparangkoba napbolatna man·jachim. Indakesa sak 8 napbolna sengenggiparangoni chitti see Rev. Miles Bronsonko Nowgongoniko okamataha. Bronson 1867·ni April jao A·chik a·songona re·baaha. Ua Goalparaoni April 12 Sukrobar salo Damraona re·bae attam 5:00 bajio unona sokeaha. Uano sak 15 poraigiparangko nikeaha. Salgipino Sonibar 13 tariko Rajasimlaona re·angaha. Robibar April 14 tariko gilja ka·ani ja·mano sak 26 bebera·giparangko napbolataha. Ua salon Rajasimlako Mondoli songan baksa Omedko Reverend songaha aro pamongba donjolaha. Indiani salgrosalaramo donggipa Kristianrangni gisepo Omedan ordain ka·ako man·chenggipa ong·aha. Salgipino sak 10 bebera·giparangko napbolatdapaha aro Omedba Rev. Bronson baksa napbolatpaaha. Indake Robibar salo sak 26 aro Sombar salo sak 10, gimik sak 36·ko

ua salgnini gisepo napbolataha aro Isolni songnoko chanchapataha. Da-o Ramke, Omed aro Rangku gimik sak 39 bebera-giparang baksa ian skanggipa A-chik a-songo mondoli ong-aha.

Rev. Bronson ua somoio baditan kusi ong-enggenchim aro Isolko mittelenggenchim! Bilsil 30 Gitelna gamo indakgipa katchaani obostako ua changsaba chagrongjajok. Da-o “Karen” jatko man-aha. Uamang Karenrangko am-bajaha, indiba Karenrangsa bikpile uamangko am-aha. Ia gital Mondolini memberrangba Sibsagar, Nowgong aro Gauhatini member gimikko dondimaming apsanpilachim. Da-o Home Board Assam Missionko chipna agantaijawaha. Ia Rajasimla Mondolian aro ja-mano ong-katanggipa Mondolirangan Assam Missionni mongsonggipa pangchakgipa krongrang ong-aha aro Ramke aro Omedni kamrangchi ong-katgipa Mondolirango pangchakesa Assam Mission dal-rorobaaha. Iaba namen itihis gita ong-gipa kam ong-chongmota.

Beanbebe Rajasimlani obostako knasoon Home Boardba namen kusi ong-aha aro bakan Assam Missionna tangkarangko chamtaiaha. Rang-sanan Missionaryrangkoba A-chikrangona watataha.

Uamang mamasani kam ka-achi bilsisani gisepon bebera-giparang sak 150 ona tang-doaha aro bilsil 7-ni gisepon bebera-giparang sak 400 ong-aha.

Omed Rajasimlao kam ka-e bebera-giparangko man-dapaha aro Ramke an-tangni skulo poraigiparangko Mondolio dilchina name tarie watatskaaha. Uni gimin mitamrang Ramkeni Damra skulko “Bible School” ine mingrongbatna namnika. Iaba uamangni Mission Strategy ong-a. Mondolirang jekai Isolni songnokni barianio nangchongmotgipa ong-a, indaken Ramkeni Damra skulba nangchongmotgipa ong-a.

Ramkeni Itihaso Gisik Ra-na Kragipa Gipin Kamrang :

(a) Toromo Dilgipa : Ramke toromo dilgiparangoni nambatsranggipa saksal ong-a. Ua jekon skia indaken an-tangba janggi tanga. Sastroo Paul jekai Philippi-o donggipa manderangna agana, “Angko ja-rikgiparang ong-pabo, jongadarang...” (Phillippi 3:17a), Ramkeba apsankon aganchong-motna man-gen. Ua A-chik Kristianrangna Paul gita ong-chongmota. Mitamrang uko “Job”,

mitamrang “Johan” inc biming donaha.

Ramke an·tangsan okimu chake Isolo bi·aijaha; an·tangni chatrorangkoba antio salsako ra·e okimu chake Isolo bi·dilrongaha. Ua mikkang nigipa mande ong·ja aro pap ingipako namnikgijagipa ong·a. Indaken ua uni jikgipa Subonikon 1878-ni February 12 tariko Mondoli a·pal gale, 1880 ni August 8 tarikosa rimnappilaha. Ianaba a·gilsak aiaa inmana.

Ua an·tangni duk ba kalimaniko Isolni kamna namgni ong·atskaaha. Uni depante Dhonsing B. Sangma Serampore Boarding Schoolo poraiachim aro uan man·sramgipa chatro ong·achim. Uko “Bengali Scholar” ine agana. Ua chuttio songona re·baon sagitike, 1887-ni August 1 tariko Nishangramo siaha. August 2 tariko ua Rev. Masonna depanteni sianiko “Angni depante siaha” ine seatgija “Angni depante mejalo an·sengsrangaha” ine Kristian bebera·gipa gita seataha. Jagipino, chong·motan September jao, ua kinggipin chittiko seattaiaha. Uko ua depanteni ba·rarangko pale aro an·tangni chimonggiminoniko Rs. 109/- ko on·atjole indake seataha. “Dhon tangkuode Gitelna kam ka·genchim. Da·o ua dongjahani gimin uni palo sakoba dakchakskachina anga ia tangkako on·atenga. Nishangramo pamong ka·e uni dormaha man·paa japrao Rs.10/- sanchim. Ua somoio Rs.109/- namen bang·ahachim. Minggipin ua depanteko Seramporeo poraiatna Missionaryrangni dakchakanikoba bi·amjaha. Sina skang depante, Dhon, nambegipa git “Chatbea An·chichi”, jekon A·chikni Ring ani No.186 - o nikna man·gen, uko tarie donangaha.

Jadokni ja·mano saksamangmang demechikba sisrangaha. Ia changoba ua Isolni kamna Jakkalchina Rs.66-10-3-ko on·ataha. Ua an·tangan degri ong·e a·gilsakni gita noksan ong·beahaoba, an·tangna gimaaniko Isolna man·dapani dakatskaaha. Indakgipa toromo dilgipako Indiani salgro·salaramo donggenchimoba bang·e nikchongmotjawa.

(b) Uni Cholon-bewal: Cholonan ku·sikna bate rakbate agana. Unbaksa ka·rimgipa missionaryrang darangba uo ong·sianiko nikjaha; batesa Rev. M.C. Mason indake aganaha, “But the most marvelous was the Christlike character given to this man, born and brought up a heathen in the midst

of heathenism, with all its sins, its ignorance and superstition. In all my acquaintances with him, covering a period of seventeen years, I never, to my recollection, found a flaw in his character. His word was safe in any capacity. Seemingly there was no desire to stretch or curtail the truth, much less to falsify. His mild and even temper, kindness and wisdom, made him a genial friend and confident. His steady devotion to the kingdom held him to the best interest of the church, even to the facing of intense suffering and the severing of the family ties. I shall never forget the occasion when, as pastor and leader of the church, he had to discipline and exclude the mother of his children."

Ramkeni kam-cholonni bidingo mamingkoba agandapna nangjawaha. Kosako Rev. M.C. Masonni aganania nambatsranggipa "character certificate" ong-gen.

(c) Namgipa Skigipa : Ramkeni skigipa ong-ani gimin Rev. Miles Bronson nambee aganaha. Ua 1867 April 2 tariko skul nion. poraigiparang sing-aniko namen aganchakna man-a ine ua seaha. Ua indake agandapaha, "Ramke teaches well." Unbaksa Ramkeni janggi tangani gimikan poraigiparangna oprake on-enggipa ki-tap gita ong-chongmota.

(d) Sea Jotani: Indiani salgro-salaramo donggipa manderangni gisepode Ramkean lekka sechenggipa aro ki-tap dakchenggipa ong-gen. Ua Sastroko pe-na Missionaryrangko dakchakaha. Ua dal-begipa Bengali A-chikku Dictionaryko tariaha aro uko bilsa bongani gisepon, chong-motan 1877-oni 1882-ona see matchotaha. Ia Dictionary-o jak 884 donga aro kattarang ming 35,000 - na bata. Indakgipa ki-tapko bilsa bongani gisepo matchotania aiao inmanani ong-chongmota.

Ua bang-a namnamgipa articlerangko A-chikni Ripengo serongaha. Ua poedorangko seaha aro gitrangkoba ming 25-na baten tariaha. Ua an-tangni janggi tangani giminba magazineo "Ekjon Osoibho Garo" ba "Skia Man-gijagipa Saksa" ingipa, Bengali "Kristo Bandho" ine biming done Kristian ong-gijagiparangna seaha. Ua uko 1885 - 1886 bilsirango seaha.

(e) Niksamsogipa Mande: Ramke niksamsogipa Kristian dilgipaba ong·a. Uni skiachi adita Kristoo bebera·giparang ong·katbaahaon uamang songsarek grimo dongna man·jawa ine nike, ua an·tangni ja·sku dipane Isolo bi·ronggipa bolsalgrimo dingtangmancha Kristian songko a·bachengataha aro uan 1870-71 bilsirango ong·aha. Ja·mano iako Rev. Miles Bronson Sastro Gitrang 20:5 -o pangchake "Nisan Song" ba "Nishangram" ine minge donangaha. Ramkena skang mamatang Omed Rajasimla ba Kristian songko rikdilhengaha aro uko Carey "Jerusalem of the Mission" ine mingaha. Iako dakani bebera·gipa nokdangrangko nambate bakrimatna aro namgipa Kristian songsarko rike aganprakaniko dakna ong·achim.

(f) Mondolini aro Songsarni Manderangni Janggi Tanganina Cholorangko Dake On·ani: Mondoliko rikna gisikni bidingo didian baksa nanga korosrangnaba maikai man·gen ua chanchiaha. Indake uni nambegipa aro ronggrikgipa gisiko mingsa nambegipa chanchiani sokbaaha. Uan merong jakkep ong·achim. Pringo aro attamo mi song·na toe ra·giminoniko Isolna minge napbola man·gipa me·chik sakprakna jakkeprak donata. Ua merongko Robibar antin Giljaona ra·anga aro kangalrangna dam nom·e pala. Indake iachi Isolni kamko ka·na koros man·an baksa kangalrangna dakchaknaba chol ong·aha. Ramke aro uko prochar ka·gipa Salje K. Sangma a·bachengaonin merong jakkepkoo Isolna jekai dan on·a, indake Isolo bi·esa donchina skiaha. Da·alo Ramkeni ronggrikgipa gisikoni ong·katgipa "Merong Jakkep" -ko bang·a a·brini jatrangan sningenga aro America a·songo iako ja·rikjaoba ia bewalko da·alonaba namen mittelenga.

Ramke Kristianrangko songgital rikdile dongdilajja. Ua uamangni janggi tangani cholrangni giminba namen chanchiaha. Indake ua an·tangan an·tangni Mondolini manderangko a·pal pe·dilaha. A·pal pe·dilan baksa ua Dandalma chibimako na·gil kae chirangko ra·bae game cha·dilaha. Uamang na·gil gatna bilsisa baten nangaha aro uko gatgiparangara - Singrin Sangma, Ringsan Sangma, Diba Shira, Jengrin Marak, Taram Momin, Diga Sangma, Rodeng Sangma aro Semal Marak. Indake manderangni janggi tanganina chol dake kam ka·giparangoni dilchenga

Indiani salgro-salaramode Ramkean ong-gen!

Bon-atani :

Ramkeni kamni gimin aro uni itihaso mongsonggipa biapko man-ani gimin sandiode, uni bi-samitingo songsarek ong-e janggi tangaonin uni 1891-ni January 25-o siaonan itihase ong-aia. Uan ramram itihase ong-ja, indiba dingtangmancha mongsonggipa itihase ni bak ong-a.

Ramkechin A-chikrangni lekka-pora, skia man-ani, torom, sea-jotani, janggi tangani chol aro indake pilakni bidingon A-chikrangni siloroani sokbaaha. Uni indakgipa kamrangna da-alu uatangkude National Award man-genchim. Da-alu CBCNEI, Dal-gipa Krima aro gipin Krimarang uko gisik ra-na krachong-mota. Assam Mission aro ja-manu CBCNEI Ramkemang mamasani gimin mangmangsa pangkamna man-aha.

Ramkeko Church History-o a-gilsak gimikchin u-ia; indake uan A-chikrangni gisepe saksa a-gilsak gimiko niksenggipa mande ong-a. Ramkeni indakgipa kamrangna Dr. Milton S. Sangma uko "Maker of Modern Garo Hills" ine minga aro uan krachong-mota. Garo Literature Society uni pilakjatna a-songni namgnina kam ka-anina uko 1990-ni February jani Seminar-o "Father of the Garos" ine mingna tik ka-aha.

A-chikrango basakoba Ramke atchitaigenma? Hai an-ching A-chik sakanti chanchie nina.

References :

1. Downs, F.S. Indian Church History Review, p. 79; Vide also by the same scholar, Mighty Works of God, p.18.
2. Downs, F.S. Indian Church History Review, p. 81.
3. Ibid
4. Ibid
5. Downs, F.S. Mighty Works of God, p. 44.
6. Barpujari, H.K., American Missionaries & North-East India, pp. 51-52.
7. Kristo Bandho, A-chik Ripeng, Vol. 32, No. 1, Jan. 1912.
8. Ibid., Vol. 32 No. 5, May, 1912
9. Carey, William, The Garo Jungle Book, p. 67

10. A·chikni Ripeng, Vol. 32, No. 9, September, 1912
11. Ibid., Vol. 32, No. 8, August 1912
12. Barpujari, H.K. The American Missionaries & North - East, p. 282.
13. Souvenir of the Tura Baptist Church, 1982
14. A·chikni Ripeng, Vol. 32 No. 10, Oct. 1912; vide also Church Enrolment Register of Rajasimla Church available in the office of the GBC.
15. Aier, K.I., Growth of Baptist Churches in Meghalaya, p. 37.
16. Carey, William, The Garo Jungle Book, p. 196
17. A·chikni Ripeng, vol. 9 No. 8, August, 1887
18. Ibid. Vol. 9 No. 9, Sept. 1887
19. Carey, William, The Garo Jungle Book, p. 203
20. Barpujari, H.K., American Missionaries & North - East, p. 285
21. A·chikni Ripeng, Vol. 32 No. 1 January, 1912
22. Souvenir of the Nishangram Church (Centennial), 1968
23. Carey, William, The Garo Jungle Book, p. 216
24. Nokdangni Ripeng, Vol. XXII, Part 7, May- Dec., 1989; vide A·chikni Ripeng, Vol. 75, No. 7, June, 1957 & vol. 70, No.4, April, 1952; vide also paper presented during ABDK Mission Conference, Nishangram 1990 and Paper presented at Matchakol CLC, Oct. 1990.
25. Centennial Souvenir of Nishangram Church, 1968.
26. Ibid.

REV. RAMKE WA·TRE MOMINNI A·CHIKNI SEA-JOTANIO JAK ON·PAANI

Filimina Bangshall Sangma

Rev. Ramke W. Momin A·chikrangoni skanggipa skia man·gipa Kristian ong·e, jattangna nambegipa ramako mesoke donangaha. Ua jat gimikni skia man·anio, toromni bidingo janggi tanganio, A·chik jatni silroroaniko ra·bagipa, gisik seng·gipa aro niksamsogipa mande ong·a. Rev. Ramke W. Momin an·tangan lekka-porana gisik nangbegipa ong·e, jattangko mikaoatna ske Damrao skulko kulichengaha aro skulo skian baksa toromni giminba aganprakna cholko ra·aha. Ua chasongni mikmalgijagipa A·chikrangko ka·saachi aro jaksramachisa salbana man·gen ine namen ma·siachim. Ua kantango aro cholontango ong·sigija dakmesoke aro an·tangtangona re·bagiparangna ba noktangko re·pakgiparangnamangba jiksesean jaksrame on·e ka·sne-ka·sne mikmalatesa, lekka-pora skie ra·ani aro toromni gimin agane skie on·rongachimi. Indakesa, ua bang·akon toromona salbana man·an baksa lekka-porani giminba gisiko nangatbatbeaha.

"Miksonganio aro chanchisoanio Mission-ni pangnan dal·begipa dakgni kamara 'Aganprakani' ong·a. Uni gimin skia man·gijagiparangni gisepo lekka poraan toromni dal·batgipa jakrikra ong·na nangchongmota." [E.G.Phillips Educational Works among the Garos. Jubilee Report 1885]. E.G.Phillips-ni gipin janapani dongkua - "Skia man·gijagiparangni gisepo ka·sin ka·sin Kristian torom napangan baksa, sea - jotanirangkoba bang·en dakroroangna nanga. Sastroko pe·na nanga aro Kristian toromni bidingo rokom rokom scanirangko uamangna on·na nanga." [Jubilee Reports, 1886]. Ua Missionary-rangni ka·dongna man·gipa jakkaltobegipa mande ong·e, toromni bidingo sea - jotanirangko aro Sastroni bakrangko pe·skaanirango bang·en dakchakbeaha. "Months and years he spent in direct association with them translating the Scripture and preparing books for the press." [Garu Jungle Book, W.Carrey, page 203]. Ua gipin jatni ku·sikrangkoba ku·siktang gitan

namen ma-siachim; indaken Bengali, Assamese aro Englishchi segipa Biblerangoniko A-chikkuona pe-skaaha. "He always carried along with him a copy of the portion of the Bible which he translated into the Garo language to which Missionaries gave the finishing touch and published." "He also translated some portion of the New Testament and the Genesis, which were revised by the Missionaries." [History of Garo Literature - Dr. M.S.Sangma, page 20]. Damra skulo skie jakchakjabeoba, ua sea-jotanirangko aro Sastroni dingtang dingtang bakrangko pe-skaaniko daknade somoiko dingtangmancha ra-rongaha. Ua Bengali-Garo Dictionary jeon hajal sotbribonga kattarang donga, ua dal-batgipa kamko bilsa bongani gisepon, chong-motan 1877 oni 1882 ona see matchotataniara uni gisik nangbee kam ka-ani sakki ong-a. "To mention one item only, he put into Garo the definitions of a Bengali Dictionary of about forty-five thousand words." [Jungle Book. W. Carrey. page 203]

Ramke bang-en seanirangkoba A-chik magazine-rango serongaha. Indiba gitchambegipa magazine-rangosa ong-ani gimin uni segiminrangko poraie nina chol man-ja aroba gitcham magazinerangko niknaba neng-aha. Uarangko mitam nokdangrangosan simsake tarie donaiaha.

Ramke an-tangni janggi tangani giminba see donanga dongachim ine agana. Uarangko sandie nioba man-jaha aro 'Oe, dongachimna', inesan agantokaiaha.

A-chik a-songona re-bachenggipa Missionary-rangni segipa/pe-skagipa ki-taprangko niode, Rev. Ramke W. Mominni jak donga gita nika, maina A-chik kattarang namen sronga aro rongjrie seanirangko nikna man-a.

Ramke ka-sachakninggipa aro chanchininggipa mande ong-a ineba ki-taprangoniko poraie nika. Bi-samitingo boloni ga-ake uni jak skang gita nampilgijanio, chasongskarang baksa kal-rimpana man-jae, ua saksan songko nokko re-roroe a-bri-chiringrangko niwilwale a-song nitoaniko nike jattangna ka-saaniko aro gamchataniko ma-sibataha. Uni jattangna aro Isolna ning-tue ka-saaniko bang-bea uni tarigimin A-chikku gitrangko, 'A-chikni Ring-ani aro Olakiani Ki-tap'-oniko nikna man-gen. Andalao janggi tangenggipa manderang kakket ong-e Isolko bebera-na man-na gita, ua bang-a gitrangon an-tangni gisiko skanirangko aro

chanchianirangko paraka. Jekai, git No. 228- Gitelni Bi-a.

"Oh Gitel, Salgioni

Ra-chong bimungko Nang-ni,

Nang-ni Songnok jelchina

Songantina gipchina

Ong-jok maikai Salgio

Ong-chong indake a-o."

Git No. 34, Neng-takani Sal:

Bimung minge Jisukon

Darangan mitelchina.

A-songanti darangan

Janggitanga dipetna.

Gipin gitrang No. 3, 4, 13, 21, 98, 127, 182, 183, 231, 232, 262
aro gipinrangoba uni Isolo kimkim ong'e bebera-aniko aro an-tangni
manderangkoba Isolona salbana skani kattarangko nikna man'a

Poraiani Ki-tap IV -ni (Published by Tura Book Room) jak 83-o
lesson 41- gipa "Simano Atchiani" ingipa poedoko Rev. Ramkeni seaniko
nipilate nina. Ua Isolko u-igijagipa ong'e atchie, jatangni olakkienggipa
bebera-anio ba krita - amuanirango mitena do-o do-bokrangko doke
krite amuanirangko daksninggipa ong'achim. Indiba ua Kristian ong-
ah-a, uamangni dakanirang skia poraia man-pajani a-selsa ong'a ine ua
ma-sia; indaken ua an-tangni bi-samitingo miterango bebera-aning somoio
maikai A-chikrang simano atchipiltaia ine bebera-a aro Kristian
ong-manahao uni u-ianirang dingtangbeaha, uko parake seaha gita nika;
maina ua bon-kamgipa podo indine agana-

Sigiminni janggikosa me-mang ine minga

Janggiara maidakesa gamna suna man'a;

Uni gimin a-jak rim'a inaba ong-jasa

Manderangni u-ijae agana kattasa.

Indake ua dingtang dingtang seanirangchi jattangko de-mesaaha.
Bidani ku·bibakosa A·chik A·songni pilak bakranganon ua spoataha.

Rev. Ramke A·chik A·songna aro A·chik jatna toromkosan
ra·bachenggipa ong·aija, skia man·aniko ra·bachenggipaba ong·a.
Toromni do·ga oprake ua teng·anikoba A·chik A·song gimiknan
teng·napataha. Uko A·chikrangni Pagipa ine biming donaniara krabea.

Ramkeni, ia dal·begipa ja·kuko ga·chengdile A·chik jatko ia da·oni
gadangona ra·baanina an·ching saktian uko mittelpilskana kraa, maina
ua Kristian ong·chengon chanchisokpilgija neng·nikanirangko aro
chonnikanirangko man·beaha. Uni siani da·o bilsa ritchasa ong·aha. Uko
mittelpilniko mesokna gisik ra·aniko dakaniara kusi ong·beani ong·a.
Uni nangipa kamrang, gunrang an·ching saktikon didiatani ong·china,
maina -

"Ong·jasa bilsio, tanggen kamtango,
Nama kam dongrikkugen janggi siango".

RAMKE WA-TRE MOMIN: LEKKA-PORANI BIDINGO U-IBEGIPA

Ma Viola Sonachi Bangshall Sangma

Aganchengani: "Education" inon lekka poraina aro sena sapanisan ong-aija. Ia katta apalen man-gopgipa ong-a. Iano taningni ma-sisokani. gisikni chanchiningna changani, songsarni noksul nokripengming meli nangrimgrike janggi tanganiko u-iani - iarang pilakkon man-gopa. Je mandean saksa sakgipinna skia poraianiko on-na gita pilak niamrang aro cholrangko ma-sia aro uko gipatna kamko ka-e chu-sokata, ua mandekon "lekka porani bidingo u-ibegipa" ine seng-sote donna man-a

A-chik jatni gisepo saksa mande ia bimingko ra-na man-gen; uan Ramke W. Momin.

Nokdang: Ramke W. Momin Matchokgre songo 1833 ba 1834 bilsimango atchiaha. Uni ma-gipako Noring W. Momin nangachim. Uni pagipa siani ja-mano, ma-gipa sakgipinko ra-taaha. Uni jonggipa Fokna W. Momin aro nogipa Wa-re W. Momin (Dobaki Mominni ma-gipa), uamangni bimingrangko, Kristian ong-chenggiparangni dolo nikna man-a. Ua songsarek nokdangni ong-a. "Angni ma-a paa mamingba champengagrian jaksil gana aro kotip gitechak kana man-achim. Angni ambitangni nogipani segipaan angni atchiram songni a-ani nokgipa oia-achim". Uni nokdang, ua somoirangonin dilgipa ong-aniko man-a inc nikna man-a. Songni ba gittimni Noknako darangan mandera-a aro dal-e rakkia. Beben kajinarangko ra-ja, indiba nangan salo jinma dakgrima.

Lekka porako u-ibaani: Ramke bi-saonin chanchirakgipa aro sontolgipa ong-a. Ua an-tangni duulao mai ong-enga aro maiko dakenga uko u-ina ske, nirikkina aro daksninge nina sikkbegipa ong-a. Indaken ua ja-delgiparangni mitena boli on-arangko, kritarangko, sambasiarangko sriksrik buringo daksninge roaha aro uon kakkete bebeba ra-achim.

Miterangko ka-onangatode saani aro dukrangko man-a ine aganako knae, una kenenba salanti ong-nasipile an-tangni do-bisa matbisa man-arangko boli on-rongaha. Antirangchi re-rongon, ua dingtang-dingtang pala sin-arangko nikan baksa, bigil gipok manderangkoba gisepo nikaha aro uni gisiko nangatbatgipa nikaniara, "Songni Sorkarrang, dal-a dal-a mondolrangni ning-o donge, kajinarangni hisapko rakkigipani lekkao nikronggijagipa chinrangchi seako nikanian ong-achim. Unbaksanaba, kachario an-tangtang gitan A-chikrang 'interpreter' -rang ba A-chikku pe-timgiparangni Bengali ku-sikko srangsrang aganna changaniko aro uamangni kachario aro songo nokoba mongsonggipa aro niksenggipa ong-anikoba nikaha. Ramke aro Omed mamasaan iachi gisik nangatako man-aha. Indake Omed, Ramkeni mamatang, grigipako uni u-igipa Bengali Sorkar-ona re-dilange, Bengali ku-sikko skie ra-na a-bachengaha. Uamang uamangni skie man-bagipa Bengali oikorrangko a-dimuo go-olchi see niaha, mail rong-terango see ja-rikaha aro on-tisa lekka bichitrangko man-ode, uarangoba see roaha. Nokô kam ka-gija rorame donga ingipao haida Ramkeni ma-gipani kimtaigipa, uni wanggipa namnikjahakon; indaken Ramkeko ia skie ra-aniko dontongataha. Omed saksan re-na sikjae, uaba dontongpaaha.

Indakmiting somoio, East India Company, Captain Jenkins-ni jakchi 1847 bilsio Government schoolko Goalparao kuliaha. Uano porainakgipa me-a bi-sarangko nangenga aro uamangna cha-na-ringna aro ganna-chinna indin on-gen ine antini salrango parakataha. Omedni bilsirang aditan re-angahaoba, ua aro uni gritang Reban, gipinrangoni Remsing aro Jongrin Goalparaona poraina re-angchengaha.

Iana skangsan mangmang Ramke boloni ga-akone jak aro pakkreni greng be-e aro, adita saknaanirangko man-e dongengachim. Bebeko aganode uko tangpilna ka-donganin dongjachim. Jadokni ja-mano uaba Goalparaona re-ange apsan schoolon Omedmang Rebanmang baksa, mol-moltaitaiani ja-mano biapko man-e poraina a-bachengaha. Ua uni poraianirango inditan gisiko nangbegipa ong-aha. Sorkari poraigipa sakprakna bilsio "chola sikgni, dhuti sikgni, gamcha kingsa, chola kot kingsa aro sin-karini ba-ra siksa"-ko on-achim. Salantini nanggnina sakprakno, "merong se-elsa, am-bol se-elsa, cha-ani to adha chotak, kari

adha chotak, paisa pelsa adha" -ko on-rongaha. Cha-na bon-gija kariko chimonge chimonge bang-kalahaode uko palskaenba. Ramkeba unoni anagni pelchikkingkode man-paachim. "Bimchipe walgimik seode, oikor namatna man-a" ine Ramke knaenba, uni seaniko namatna ine bimchipdugae walgimik gimik seora, ua bilonge jagittammangna sataiaha. Uko saksu Oja skulona re-bagakenba nikaaha aro samko on-e sanahaoara, sal sku ba sal chikkingni ja-mano ua an-sengpilaha. Ua an-tangni chimongaoniko Ojana, "paisa anna chi-bri, ki-tap kingsa, chador siksas, dhuti siksas" -ko on-aha

Indake uni poraimiting salrango, 1856 bilsio. Rev. Rupreet Bion. Daccas songdonggipa Baptist missionary, Assamona re-bae, Gauhati aro Goalparaonaba songreange aganprakanirangko dakaha. Ua toromni ki-taprangko manderangna sualaha. Ua ki-taprangoni kingsa "Apoti Nasok" ba "Pa-sikako Gimaatgipa" minggipa Ramkeni jakonaba sokangaha. Iako poraie niahaon, uni skangonin bebera-baenggipa miterang aro uni dal-e-ra enggipa Hinduni Brahmon aro Ram, pilakan uni gisiko bringbrangatako man-aha. Una dal-bea jajaanirang sokbaaha. Badian torom chong-mot ine gisiko chanchie ua jajr-ngbezaaha. Ia apsan ki-tap, uni mamatang Omedjean unomiting somoiode, school poraiako wate Gauhatio sipaini kamkosa ka-engahachim, ukoba Kristian ong-na didiataha.

Skulni porikka ong-aha. Achik bi sarangan darang gipin jatrangna bateba nambate dakaha. Ramkean skanggipa ong-aha. Unon uko Rongjuliona 1856 bilsio skulni skigipa dake watataha. Ua uano ja 11 mang kam kare, Goalparaonan re-angtaie bilsisana poraidapangaha. Unon bilsini porikka ong-taiaha: ua porikkaoba Ramke skanggipa ong-taiaha. Mamagipa Omedni okamatako man-e Ramke Gauhationa re-ange, unbaksa dongeaha. Gauhatio Normal Schoolo napna dorkasto galon, biap man-enba uano napaha. Ia salrangmitingo Omed an-tangni Kristian ong-na namnikanirangko Ramkena parakaha. Uamang sakgnian Bengali Kristian mande Kandura minggipaona re-rongachim. Ua uamangna toromko skiaha.

Ramke ia somoi, Kristian toromko namnikmanchae ra-a ong-jachim. Isolo bi-arango sko bangopanirangko, jinmani dakanasan

dakpaaiachim. Uni miksongmanchaade, English ku-sikko skie ra-nasachim. Indiba ua ia cholko man-jaha. Indake ua Robibar salrango skiatgipa mingsa minggni English kattarangna agrede Bengali aro Assamese ku-sikrangkosa nambate man-aha. Bilsisa Gauhati Normal Schoolo poraiani ja-mano, Ramkeko D.C. Becket Nibariona aro uni ja-mano Jiraona policeni kamko on-e watataha. Indake adita bilsirangna kam ka-ani ja-mano ua Damraona sokbaaha. Ua Amjongani me-chik saksa Suboni B. Sangmako ua somoio bia ka-aha. 1863-ni Feb' 15 tariko Omed baksa Gauhation Sukleswar Ghat-o, name chanchitaitaiani ja-mano Kristian toroman pilakna bateba nambata ine, apan napbolaniko man-aha.

Uni kam ka-ani:

Chio napbolani, uni gisiko toromni kamko ka-chinasan ong-aigija jatna kam ka-na skani gisikkoba naataha. Jatangko andalaoniko seng-aona ra-banade an-tangtangan kam ka-na nanggen ine ma-siaha. Rakbegipa aro kenbegnigipa kam ong-gen ine niksooba, ua kang-kare kaaha. Ramke aro Omed mamasa, Missionary aro D.C-ni dakchakaniko man-aha. Uamang an-tangtangan jiktangtangko rimbae 1864 bilsionin kam ka-na a-bachengaha. Omed toromko gipatna aganprakanirang aro bi-anirangko dake songrangona re-rotoangaha. Ramke Damrao skanggipa Achik schoolko kulichengaha. Skia poraia gri maming saloba mande siloroaniko, namrotoaniko man-jawa, uni gisikko de-mesajaskal maming saloba toromni giminde ma-sisrangjawa ine Ramke u-iaha. Uni gimin ua lekka-porako, sea-jotanikon Achik mandena u-iatchengna nanggen ine ukon mongsongbate ra-aha. Ua an-tangni jonggipa chonbatgipa Fokira Momin aro saggipin bi-sarangko rimbae uni skulo napataha. Ua uano Sastoni bakrangko skiaha. Bengali oikorrangko sena skiaha. Rongtal-an-tale donganirangni gimin, dakbewalrangni gimin skianiko dakaha. Ia skulo poraigiparang an-tangtangna u-ie ra-nasan ong-aigija, saggipinrangkoba skiskana miksonga gnang tarisoaniko man-enga ine nike, 1867 bilsio Rev. Miles Bronson Damra skulko Normal skul dake ra-doaha. Uno poraigipa sak 15 dongachim. Ia apan skulko nambate nirokna man-na gita, Dr. I.T. Stoddard 1875 bilsio uko

Goalparaona ra'angaha. Jensalo Turaona D.C -ni Kachariko ra-bae, uno songdongna a-bachengaha, unon 1878 bilsini March jao ua skulko Turaona jitbaaha. Indake da-alona kingkingba ia school Boys' Schoolni bimingo dongenga.

Uni sea-jotanirang:

Ramke Momin Bengali aro Assamese ku-sikrangko sena, poraina aro aganna man-gipa ong-ani gimin, ua Missionaryrangni lekka seanirango, bang-a pe-skaanirango dakchakaha. 1878 bilsio Rev. Phillips baksa Garo Hillsni salgro jolrangko songreroromitingo Bibleni 'A-bachenga' ki-tapko A-chik ku-sikona pe-na dakchakaha. 1885 bilsini July jaoni "Kristo Bandhab" ingipao, Ramke, an-tangni a-song aro an-tangni janggi tangani gimin "Saksa Skia Man-gijagipa A-chik" ine jaantio tong-prak tong-prak dake 1886 ona Bengali ku-sikchi see gatataha. Ia seanio ua an-tangko onatbee seaha. Ua somoio A-chikrang maikai ong-achim, A-chikrang maiko bebera-a, maina kena, maidagkipa ong-a, ukoba ua u-iatna gita seaha. Ua toromni gitrangkoba pe-skaaha. A-chikni Ring-ani Git-o ming 19 mang uni seanirang ong-a. Una agreba ua bang-a poedorangkoba skidapani gnang seaha. 1887 bilsio uni Bengali-Garo Dictionary tarigiminko chapu karaha. Uno katta ming hajal 45 mang donga. Ian apalbegipa ka-na nanggni kam ong-achim aro jatna dal-begipa dakchakani cholba ong-aha.

Bon-atani:

Ramke Momino uni formal educationni chu-onggipa certificaterang ba degreerang dongja. Uni gimin uko haida da-ororoni skia man-gipa dolni manderang "lekka-porani bidingo u-ibegipa" ine donna jechaknaba gnang.

Da-ororoni somoiko gale, ua batanggimin chasongni salrangkosan ra-na. Unomitingo Indiani salgro-salaram a-dok gimikon skia poraia man-giparang komisranga. Unomiting somoio Ramke, je on-tisa skiako man-paaha, je u-ianiko u-ipaaha, ua uko an-tangnasan donari uni namgniko man-na sikjaha. Uko ua sakgipinrangnaba sualna skaha. Ua schoolrangko kulic, uno skianikoson dakaigija, uko tangkamataha. Uno

napgiparang sena-jotna aro porainasan changai- sapaijaha. Uamangan toromni procharokrang ong·aha, uamangonin policeni kamrangko ka·aha, uamangonin Sorkarini tikka su·tingiparang ong·aha aro uamangonin schoolrangni skigiparang ong·aha. Fokira W. Mominko Head Master dakate 1867-o Rajasimla Schoolko kuliaha. Indake Ramkeni Damra Schoolonisa bipekhang naaha aro bidani bil·chamko so·rikrikna a·bachengaha. Uni schoolchin A·chik Jatni mikronko mikaoataha. Turao songdonggipa aro Turao donge dingtang dingtang biaprangoni re·bae poraigiparang ia schoolonin bimik nachengaha, maina Ramkeni schoolkosan Turaona jitbaaha ine nikna man·a.

Ramke Momin schoolkosan kuliaijaha, ki·taprangkosan seaijaha, toromkosan dilaijaha; uni janggi tangani manchaan gipinna nambegipa dakmesokani aro skiani ong·a. Uni kam cholon aro dakbewal sakgipinkoba gisik nangata aro mikrakata. Iarang pilakni gimin Ramke W. Mominko A·chikrangni gisepo saksu "lekka-porani bidingo u·ibegipa" ine aganna man·a.

Reference:

1. Christianity in North East India - Frederick S. Downs.
2. A·chikni Ripeng -1912 Jan. to 1912 Oct. issues.
3. History of Education in Garo Hills- Milton S. Sangma.
4. The Importance of Damra School- Article written by L.D.Shira.
5. The Mighty Works of God- Frederick S. Downs

Printed at Panthi Offset Printers, Sukbir Bhawan, Tura